

Giuseppa Carolella

Sicilianu sugnu!



Poesii 'nsicilianu

EDIZIONI *repanum*

2013

Autore:

Giuseppe Cardella

Via Castelli, 36 - 92016 Ribera (AG)

Tel. 0925 66028 - Cell. 338 9652710

Sito web: www.cardellaart.it

E-mail: giuseppe@cardellaart.it

Youtube: [giuseppcardella1](https://www.youtube.com/user/giuseppcardella)

ISBN

grafica_giuseppcardella

Giuseppa Carolella

Sicilianu sugnu!

Poesii 'nsicilianu

2013

Scieuriddu beddu

A la villa un journo ivu,
tra tanti sciuri a tia sciglivu
sciuriddu beddu e profumatu
di tia sugnu troppu 'nnamuratu.

'Nta 'na casuzza, comu d'ù 'nnuccenti
li manuzzi ni tinemu senza diri nenti,
'ni taliamu nni l'occhi e suspiramu,
na vasatedda duci-duci 'ni scanciamu.

Di jornu ti taliu e la notti ti sonnu,
si nni vulemu, centu nun ci ponnu,
tra carizzi e vasati 'ni stringemu,
sutta li coperti l'amuri facemu.

Un puzzuluneddu iu ti dassi,
e po'.... lu sa chi ti facissi?....
Ti facissi...ti facissi...

Ti facissi 'na grasta di brillanti
china di stiddi e di diamanti,
ccì siminassi a tia sciuri di primavera,
spuntassitu comu l'oru 'ni la minera.

Speru ca un journo tuttu s'avvirassi,
li biddizzi tò mà mi li scurdassi,
pi tia nun sacciu chi facissi,
senza lu tò amuri, iu 'ni murissi.

Piccatu, sciuriddu, c'apparteni a natru.
Lu tò cori arrubbassi e facissi lu latru,
cu mia ti vulissi, ma nun ti pozzu aviri,
fammi sentiri lu tò sciavuru, pi nun muriri.

Un muzzicuni d'apa

Vulissi, ca 'n'apa, la rigina,
di lu tò amuri tutta china,
lu cori mi pungissi 'stà jurnata
pi ristari unchiu 'nà simanata.

La genti po' 'm'addumannassi:
"chi successi?"... Nun si scantassi!
Senza sapiri cà 'mmenti mè!
Mi facissi muzzicari arrè.

D'un pratu di sciuri, 'ntrà jornu,
s'avvicina e mi gira 'ntornu,
si posa 'nnì lu pettu e vola,
lassa lu sò amuri e mi cunsola.

Di l'api , si la megliu, si la rigina
muzzicuna dunaminni 'nà duzzina.
Lu vilenu chi mi lassi su vasati,
su comu lu meli, duci e 'nzucarati.

Puncimi tuttu, nun'aviri timuri,
lassami dù gucci di veru amuri,
arsu è lu mè cori, fallu dissitari
dunacci lu meli e fallu saziari.

Resta! Resta! Nun tì 'nnì iri!
Ascutami! Nun mi fari suffriri!
Muzzicami forti, nun è duluri!
Di la tò morti nascì l'amuri.

Lu cardidduzzu

Haju un cardidduzzu
tuttu spinnacchiatu
mà mi lassa, 'nnuccintuzzu
è troppu affezziunatu.

'Stu cardidduzzu sapuritu,
jittatu suliddu d'un fossu
nascì cchiù nicu d'un jitu
ma ora e fattu beddu grossu.

'Ntà 'na festa d'amici 'na vota,
cu 'na picciutedda abballavu
giràvamu lesti comu 'na rota
mentri 'nì la facci la vasavu.

Lu cardidduzzu cumincià a cantari,
la musica ci fici un beddu effettu,
di la gaggia vuliva scappari
agitatu ristà senza rizzettu.

Menu mali ca la musica finì
e subito assittari 'nì nnì jemu.
La genti li vidivamu a trè a trè
pi miraculu nun svinemu.

Un jornu, versu li sidicianni
si graperu li porti di lu paradisu,
lu cardidduzzu fici festa granni,
ma nun capì unn'era misu.

Si ritrova 'ntà 'na tana di ruvetti
cu tantu mangiari pi lu sò palatu:
affaccia, trasi, curri e s'addiverti ...
nesci fora stancu mortu e affaticatu.

Comu vidi 'na cardidduzza
subitu ccì gira 'ntunnu. La talia,
la pizzulia, la stringi, l'abbrazza,
ci sata di 'ncoddu e la strantulia.

Criscennu, mi fici zitu
cu 'na bedda picciuttedda,
li labbruzza ci tuccava cu lu itu
pi pò daricci 'nà vasatedda.

Lu cardidduzzu la tana vuliva visitari
nun ci fù cuncessu, mancu pì pietà!
Pi accuntintallu m'appi a maritari
vasinnò nun ci avissi trasutu mà.

Ora, trasi e nesci spissu tuttu l'annu
un jornu fermu nun pò cchiù stari.
A lu cardidduzzu ci vinni un malannu
nenti di gravi! Si voli sulu arripusari.

Mischineddu, ora, si carmà,
trasi ogni tantu, quannu ci voli,
ci duna 'nà taliatedda e si 'nni và,
senti friddu, trema e la testa ci doli.

Lu cardidduzzu trasì 'ncrisi,
pirchè trasiva ogni simana
ora, 'nveci, 'na vota a lu misi
e cchiù chi và chiossà s'alluntana.

Dormi e cchiù nun s'arrimina
nun cì reggi cchiù la testa.
Passa la sira, veni la matina
jornu e notti senza festa.

Chiangemu tutti, omini tirreni,
lu cardidduzzu murì e sinn'acchianà
senza iddu lu munnu nun teni
picchè è iddu chi reggi l'umanità.

Piccatu... era beddu e priziusu,
'stu cardidduzzu era comu l'oru.
Nun lu jiettu e mancu lu 'mpirtusu
lu portu cu mia finu a quannu moru.

Arricoglimi

Vulissi ca dumani
nunn'agghiurnnassi.
Stritti tinissi li mani,
a tia Signuri prigassi.

La vita àv'a continuari
iu sulu mi 'nni vogliu iri,
A mia lu Signuri àv'a pigliari,
tutti vatri v'aviti a ristari.

Ora, mi nnè vogliu iri,
troppi cosi torti ccì su.
Pi favuri fammi muriri,
propriu nun 'nì pozzu cchiù.

Pì aviri tecchia d'amuri
unu veru s'av'ammazzari ?
Li peni sunnu troppu duri,
li gioi mancu pì parlari.

Mi stancavu.
Signuri, fallu pì favuri.
Arricoglimi !
Arricoglimi !

D'intra di mia sugnu mortu,
sciatu sulu pì campari.
Mi bisogna lu tò cunfortu,
dopu vogliu ringrazziari.

Sentu parlari d' "AMURI" !
Boh ! Ma chi veni a diri ?
'Stà parola è un disanuri
pi cù nun la sapi capìri.

Pi mia, l'amuri
è gràpisi lu cori
e dallu a lu Signuri
iddu sulu pò capiri.

Eternu Patri,
allestiti.
Arricoglimi !
Arricoglimi !

Arricoglimi, o Cristu,
chiddu chi vitti m'abbastà !
Fallu e fallu lestu,
orba di l'occhi mi stuffà !

L'amuri è pì li matri
ca 'ni ficiru nasciri.
L'atra parola "AMURI",
Chi è ? Chi veni a diri ?

Tecchia di paci

Vulissi cu li mani
acchiappari lu suli
purtallu a cu è a lu scuru
e daricci tecchia di lustru.

Vulissi lu me cori dari
a unu chi sta pi muriri
e fallu respirari.

Vulissi dari
un pezzu di pani
a cu avi pitittu
e nun avi chi mangiari.

Vulissi cu li mani
acchiappari lu focu
pi capiri li dulura di li cristiani.

Vulissi tecchia di paci
pi jittallu nni li cori
a tutti li putenti
e falli stari 'n paci.

Lu citrolu

Un jornu trasivu 'ntà 'na putia
pì accattari un chilu di pira.
'Na bedda signura prima di mia
cu la facci bianca cumu la cira
e li labbra russi comu un piparolu
a lu putiaru ci dumannà un citrolu.

Si lu pigliassi cu li stessi sò mani,
si scigliassi chiddu chi ci appatisci
nun arriverannu mancu a dumani
sù frischi, viridi e beddi lisci.
Taliassi chistu, signora Enza,
è tenniru cu pocu simenza.

Sicuru ca lu sapi quali 'm'av'a dari
chiddu chi mi duna, pi mia va beni
di la sò frutta nun c'è di lamintari
vidu ca avi fudda e c'è lu vè e veni.
Piaci puru a mè cuscina Franca
dici ca ogni jornu nun ci ni manca.

Ora capivu? Certu, 'nì sugnu sicuru
chiddu chi dugnu a sò cuscina Franca,
nun è fora ma dintra a lu scuru
lu custudisciu comu 'ntà 'na banca.
Vinissi cu mia ca ci lu fazzu assaggiari
si ci piaci, a quintali 'nni po' mangiari.

Lu putiaru cu la signura si 'nni traseru
nun curannusi ca lassà a tutti 'n tridici
tutti li pirsuni ci parsi malu e si nni eru
ristavu io cu la facci niura comu la pici.
A stu puntu mi giravu 'ntunnu e taliavu,
li pira mi purtavu e nun ci li pagavu.

Quannu si mangia troppa carni
senza 'nà 'nzalata pi cuntornu
la gula s'attuppa e sù danni
si resta spissu cu lu fastornu.
Perciò la 'nsalata nun av' à mancari
pi nun cercari atri radici d'arruttari.

Quattru rosi

Quattru rosi vagnati d'acquazzina
li cuglivu frischi pì tìa 'stamatina,
sù d'auguriu pì essiri sempri amata
ognuna è sciavurusa e profumata.
La prima rosa è pì la tò biddizza,
la secunna pì 'n'eterna giovinizza,
la terza pì leggiri tutti li tò scritturi,
la quarta pì ricurdariti di 'stù pitturi.

Scaza

Scaza, 'ncapu un mantu di nivi,
mentri camini mezzu l'arbuli d'ulivi
vannu jettannu davanti a li tò pedi
petali di rosi russi senza chi si cedi.

La luna 'mmezzu li nuvuli di notti
fa luci a natri 'nammurati cotti
tinennuni stritti n'accarezzamu
mezzu la nivi l'amuri fistiggiamu.

Cu la testa pusata 'nì lu tò pettu
mi voto e mi rivotu 'ni lu lettu,
m'addivigliavu e capivu ca unn'era rialtà,
ristavu cu l'occhi chini e nenti mi ristà.

Megliu oi ca dumani

Lu suli nasci ogni matina
casdu sciogli l'acquazina.
E' 'n'astru chiaru e lucenti
certi voti un si vidi pi nenti.

Nun ti fari scappari lu giustu mumento
pi lu corpu ristari lu veru giuvamentu,
acchiappa lu raggiu cchiù splendenti
picchè dopu ha stringiri sulu li denti.

Nun lassari nenti, 'mmucca un cani,
soccu rigala oi nun lu duna dumani,
stà cuntentu picchè oi è già passatu
chiddu c'un pigliasti l'ha'ppizzatu.

Patri

Tutti cosi rifacissi, lu patri nò.
Tanti duviri, mancu un dirittu,
a costu ca murissi di pitittu.

Comu nascinu già ha piccatu
nun s'è rispittatu, né amatu
e nuddu mà t'ha ringraziatu

Li sfami, ti lu levi di 'mmucca,
mancu chissu pi iddi è graditu
si sbagli, si l'attaccanu a ghitu.

Cu l'occhi chini di lacrimi,
lacrimi ...
lacrimi ...

di vatri nun mi fazzu v'diri,
chiangiu sulu, a l'ammucciuni.
e pregu a Diu a dinucchiuni.

Figli, cari figli, figli beddi,
mi stancavu di chiangiri,
e 'ncelu mi nn'è vogliu iri

Tu sulu, Patri, mi p'è capiri,
sugnu patri, e puru t'è figliu,
levami, si p'è, di 'st'è scumpigliu.

Ddocu 'ncapu

Mettimi 'n capu 'na nuvola
e portami 'ni un celu stiddatu,
stari cca sutta m'è sugnu stancatu.

Terra! Astru cilesti, quantu lacrimi
haiu jittatu 'n 'stu mari 'nquinatu.
Ora pintutu sugnu d'essiri natu.

Cca sutta nun c'è nè paci,
né amuri e mancu buntà
ti pregu, portami cu tia ... pi carità.

Sciallu russu

*M'affacci cummigliata finu a lu mussu
di un sulu granni sciallu di sita russu.*

*Ti scummogli, ti cummugli e m'immiti
a lu piaciri pi sazzari la tò putenti siti.*

*T'accarizzu. Li mani acchiananu e scinninu,
di 'nn'abbrazzata li nostri corpi si funninu.*

*Squàgliati di piaciri lu tempu nun videmu
di la matina finu a notti d'amuri gudemu.*

Lu viniceddu

Acchianannu 'ntà nà cullinedda
e si vidi lu celu cu lu mari vasàri,
chista è la nostra Sicilia bedda
ca sulu natri sapemu amari.

Li viti chiantati diritti a filagli,
lu viddanu li zappulia cu amuri
a la vinnigna restanu li guadagni
e si scordanu fatichi e suduri.

Lu suli forti cannaria d'estati,
coci li grappuli ca penninu durati,
li coccia su beddi niuri e vellutati
fannu vèniri la 'mmdia a tutti li stati.

Sutta n'arbulu d'aulivi lu curtivaturi
cu nà fedda di pani e tecchia di cumpànaggiu
mangia e ringrazia lu nostru Sarvaturi
pi daricci saluti, forza e tantu curaggiu.

Quannu li macchinarii mancavanu,
fimmini, masculi, amici e parenti
scazi dintra un tinu mentri abballavanu
la racina scrapisavanu cuntenti.

Di lu 'ccippettu sculava lu viniceddu
chiaru, gustusu, simplici e frizzanti
si lu pò viviri puru un 'nuccinteddu
ma si ssi esagira fa cadiri un giganti.

Cu fù, cu li spirtizzi, ca 'mbriacà a Pulifemu
passannucci sutta la panza e lu dinocchiu?
Fù Ulissi cu li compagni ca lu pigliaru pi scemu.
Pi lu vinu, lu giganti cci appizzà l'unicu occhiu.

Lu superchIU rumpi lu cuperchIU,
'ni tutti li cosi ci voli l'autucuntrollu,
cchiù attentu s'ava stari quannu è vecchIU,
parti pi la testa e si perdi lu cuntrollu.

Lu vinu duna forza a li malati,
cura la menti e li mali radicati
perciò un bicchiireddu di vinu a lu jornu
leva malincunii, malatii e medici di tornu.

L'urtima foglia

Cu tristizza e senza piaceri,
passanu matini, jorna e siri.
Lu suli affaccia lucenti e beddu,
codda a mari senza un surriseddu.

La luna narrè li nuvuli s'intreccia
di l'amuri v'accurzannu la meccia
passanu notti senza cchiù 'nà festa
ora capisciu, chiangiri mi resta.

Cu l'occhi ancora vagnati di chiantu,
pensu lu passatu amuri ch'era tantu.
Ormai haju lu cori votu e stancu,
a nuddu mi trovu a lu mè fiancu.

Suliddu ristavu cu lu cori friddu.
M'arristà sulu n'amicu,.....sulu Iddu.
Lu supplicu, ma nun senti li mè canti,
vulissi stari cu Iddu e li sò santi.

L'autunnu fici càdiri li fogli.
Spizzà, puru l'amuri e l'imbrogli.
Li gioi, li carizzi, li vasati
sunnù ricordi ormai trapassati.

Sciussia ancora forti pi strappari
l'urtima foglia 'npinta pi 'n accurdari,
fra li mani la tegnu comu 'nà stidda
a dinucchiatu 'nterra pregu pi idda.

Oh! Cristu

Oh! Cristu Onnipotenti,
pensa pi 'sta nostra terra.
Cumminci a 'sti putenti
a nun fari cchiù guerra.

Di sordi e di palazzi
nun n'hannu cchiù chi fari
chi vonnu ancora 'sti pazzi
lu sulì, celu e mari?

Tra droga e ammazzatini,
nun si pò cchiù campari,
si mori tutti li matini,
nun serbi cchiù prigari.

Dàticci paci senza 'ngannu
amuri, fidi e sirinità,
sarà festa tuttu l'annu
pi l'interà umanità.

Lu mè paisi

Prestu mi susu ogni matina,
grapu porta e parmisciana
beddu suli trasi e aria fina,
vinticeddu di tramuntana.

Magazzolu, Platani e Verdura.
'Mmezzu 'stì sciumi c'è Ribera,
è terra ca lu viddanu adura
è lu vantù di la natura vera.

Di la Viradura a la Pirrera,
di li Musiti a Siccagranni
sciurisci lu paisi di Ribera
cu aranci e frutti tutti l'anni.

Li sciavuri eccellenti
si la fannu tutti a gara,
sempri idda è la vincenti
è la nostra bianca zagara.

Di Rivela l'aranciu è lu vantù,
pari lu suli 'mezzu li viridi fogli
è un piaceri pì cù l'ha mangiatu.
è friscu, duci appena chi si cogli.

Chi diri di li fimmini rivilisi:
tutti beddi fini e 'ntelligenti,
di famiglia bona, su burgisi,
laureati e tutti indipendenti.

Di 'stu paisi allegru e fistanti,
tanti cosi ci fussiru di diri
li biddizzi di Rivela sunnu tanti.
si nun ci criditi viniti a vidiri.

Cari furasteri, allura vi dicu:
firmativi a Rivela e respirati,
l'aria fa beni puru a lu nutricu,
è miraculosa e cura li malati.

Lì mè anni

M'addivigliu e semu a la dritta,
pari strammu, ma è cosa naturali
iu restu vigliu, iddu si la slitta
è la natura di li poveri murtali.

Ancora nun sentu li mè anni,
sugnu sempri comu un picciottu
caminu e curru senza affanni
ristari giovani è lu mè mottu.

Currennu puru passanu li jorna
nun n'haju cchiù li mè trent'anni
lu passatu cchiù nun ritorna
vidu passari lesti li mè anni.

Picchì, Santu Diu, nun si fermanu!
Fussi bellu ristari comu sugnu,
piaciri, ardiri nun si carmanu
picchì dopu a essiri un cutugnu?

Lu munnu accussì avà ghiri
si nasci, si crisci e si mori,
chi vò pì nun mi fari 'micchiri?
Dimmillu! Ti dugnu puru lu cori!

E' 'nutuli nun c'è nenti di fari,
nuddu pò canciari la nostra sorti
nun bastanu sordi di putiri pagari
lu prezzu pi scacagnàrisi la morti.

Allura amici cari vi dicu,
circamu di viviri e cantari
la vita è 'na mangiata di ficu
futtemuninni! Tiramu a campari.

Prighiera

Addinucchiàtu 'nterra
a li pedi di 'sta cruci,
pregu a tia Cristu
pi dàrimi un segnu di paci.

Ti pregu cu amùri,
dammi fidi comu a l'atri,
pi crìdiri a tia, Signuri,
e l'Onniputènti Patri.

'Nchiuvàtu,
cu la curùna di spini 'n'testa
n'sanguliàtu, fragellàtu,
ti fìciru la festa.

Oh! Cristu, nuddu
di tia appi pietà:
t'ammazzàru
nun canuscènnu la virità.

La Matrùzza
a lì tò pedi chiancìva,
cu li làcrimi
li chiàghi ti vagnàva.

Dispiràta a mani giunti
gridàva: nun murìri!
Sarva 'stu munnu,
nun t'inni iri!

La luci di lu sulì 'ntra jornu,
tuttu 'nsemmùla s'astutà,
lu celu si vistì di nìuru,
tuttu lu munnu trimà.

Lu poviru Crucifissu
sfinùtu, senza sciatu,
isà l'occhi 'ncelu
e lu Patri ha 'mpluràtu.

Lampi, trona,
acqua e ventu;
l'occhi chiudisti;
pi tutti fù un turmèntu.

Mortu ti scinnèru di la Cruci
c'un linzòlu e dù scali a lu latu
'mbràzza ti piglià la povera Matri
stringènnùti a lu cori scunsulàtu.

Sistimàtu 'nta lu sipòlcru
l'Adduluràta Matri la facci ti vasà,
facennùsi la cruci dissi:
sia fatta la tua volontà.

Dopo tri jorna a Gerusalèmmi
ci fù un gran scumpigliu
gridavànu tutti:
abbriviscì lu figliu!

"Gesù mortu ammazzàtu
è risuscitatu"
Ora sedi a la destra
di lu Patri tantu amàtu.

Ti ringràziu Cristu ca mi pinzàsti
la fidi ca nun avia tu mi dasti.

'Nà vasata

Ah! Si putisi dari 'nà vasata
a chidda ca haju sempri 'ntesta;
la notti mi sonno la sò risata,
lu jornu la sentu ed è 'na festa.

La stringissi forti a lu mè pettu
taliannula diritta 'nta l'occhi,
la vuccuzza ccì vasassi cu rispettu
e la sottana ccì riissi a lì dinocchi.

Lu sò sapuri sarvassi rasu-rasu
nnì la mè vucca, nnì lu mè palatu,
lu sò profumu nnì lu mè nasu,
l'amuri nnì lu cori ammucciatu.

Di tuttu chistu idda nun nnì sapi nenti,
lu ventu porta luntanu li mè sentimenti,
vicinu la vulissi pi essiri cuntenti
campassi pi idda e libirassi la mè menti.

Menu mali ca haju tutta 'sta fantasia,
nun fazzu nenti, ma scrissi 'sta poesia.

L'omu

'N'omu
mi dissi:
pirchè tu si filici
jochi e canti
e iu no?

Pirchè?... Pirchè!
Tu si omu e iu no!
Iu haju l'ali e tu no!
Iu volu e tu no!
Iu sugnu libiru e tu no!

Pì mia nun ci sù
nè chianuri,
nè muntagni,
nè mari, ne celi,
unni piaci a mia vaju.

Tu 'nveci,
prima di catamariti
a chiediri
"PIRMISSU".

Unni a ghiri,
chi a fari,
comu t'a vestiri
e comu a mangiari

Lu capisti ca si nuddu
ammiscatu cu nenti!
E di la bedda vita
nun 'nà caputu nenti!

Talia a mia,
talia comu volu.
Volu a mari,
'ncelu, a lu sciumi,
'ncapu 'na rosa.

Pi forza a essiri
filici e contenti!
Nò comu a tia!
omu di...

Bum!.....Bum!....Bum!...

Ti spararu!
T'ammazzaru!
Arraggiuni aviatu:
nenti c'è di pigliari.

Accussì semu!
Senza pietà.
Èratu filici e contenti
l'omu la vita ti livà.

La pinzioni

Vulissi lu misi cchiù curtu
pi prima pigliari la pinzioni;
a la posta succedi quarchi furto
pi li latri su mali tentazioni.

Pensu d'accattari tanti cosi:
lu frigurifiru pi lu vinu friscu,
lu rigalu pi li niputeddi sposi,
lu sicarru pì mè ziu Franciscu.

Appena li pigliu mi mettu a cuntari,
prestu finisciu, su d'è sordi 'mmani.
Chissi si mettinu sparti pi mangiari,
lu restu nun bastanu mancu pi dumani.

Carta e penna prestu p'assummari,
luci, metanu, acqua e munnizza,
scadinu tutti 'stu misi di pagari.
nenti m'è ristà, mancu pi nà pizza.

Atru chi frigurifiru, rigali,
sicarri, e viniceddu,
li promessi eru tutti a mali,
lu statu m'è spinnà comu n'aceddu.

Fussi giustu daricci 'nà lezioni:
videmu si riniscissiru a campari,
arrigalamucci la nostra pinzioni
nun ci bastassiru mancu p'è mangiari.

Perciò, pinziunati, stringemu li denti
a iddi di natri nun c'è 'nteressa nenti.

Quannu nascisti

Nascisti,
chi gioia chi mi facisti.
Ti vattiavu,
chi sudisfazioni chi pruvavu.
Criscivatu,
chi piaciri chi mi facivatu.

Ti mannavu a la scola
finu all'università;
chi mi sentiva 'mpurtanti, lu papà.

Ti laureasti,
avvucatu divintasti.
Chi cuntintizza chi mi dasti,
Iu stessu mi diceva cunsulatu
"haju la figlia avvucatu".

Ti maritavu,
di tutti cosi ti garantivu,
fina la casa t'accattavu.

Quantu tempu è passatu!
Ormai sugnu vecchiu,
mi tremanu li mani,
nun pozzu cchiù caminari,
ora haju bisognu di tia, tu m'aiutari.

Ti dicu d'accompagnarimi
nnì lu dutturi,
mi dici: mi manca lu tempu,
mi mancanu l'uri.

Nun putemu cchiù parlari,
nun nnì capemu cchiù.

Mi dici ca sugnu sturdutu,
ca nun capisciù nenti,
ti parlu ma tù nun ci senti.

T'arrabbii,
mi dici ca nnì la vita
nun haju saputu fari nenti,
mancu lu patri e mi pigli pì pizzenti

Com'è stu fattu!
A tutti capisci
e a mia ca sugnu tò patri
nun mi capisci?

La pinziunedda,
ti la pigli sana-sana;
dici ca dura 'nà simana.

Menu mali c'haju sarvati,
pi quannu sarà, li mè surdiceddi,
accussì sulu nun mi
mangierannu l'aceddi.

Figlia mia.....pì tia
sugnu nuddu divintatu,
mi lassasti suliddu
'ntà lu spìziu, scurdatu
e malincuniatu.

Bedda mè!
'na cosa ti vulissi diri:
ti la pozzu dari 'nà
vasata prima di muriri?

La notti di Natali

Tutti arruddati e chini di friddu
s'aspittava mezzannotti c'arrivava
'ntornu a lu cufularu di lu ziu Piddu
ognunu diciva la sò, lu cuntutu cuntava.

Li fimmini cu li fasdala 'mprimurati,
'mpastavanu vurciddati e pasticciotti,
cudduruna, mastazzola e 'mpignulati,
li mangiavamu casdi-casdi e beddi cotti.

'Nta lu paisi, 'nì li quartera
c'era sciavuru di durciria,
si sintiva 'd'ogni cantunera
di lu Cozzu a la Cunciria.

La Matrici cu li navati illuminati,
lu parrinu parlava di lu veru Misìa,
picciriddi, fimmini e omini allicchittati
'n silenziu ascutàvanu la santa litanìa.

Lu 'rroggiu di la chiazza ciccànni sunà,
lu sonu di li campani nun cissà cchiù;
Lu parrinu cuntenti e fistanti annunzià
la nascita di lu veru Bambineddu Gesù.

Ci fù 'n'abbrazza e vasa ginerali,
tutti nni scanciamu lu Bonn'Natali.
Nascì lu Signiruzzu chinu di buntà
pì purtari fidi e paci a tutta l'umanità.

Chi ti nnì pari ?

Sartu nascivu,
pò divintavu pitturi,
scola 'n'appi picca
ma scrivu tutti l'uri.

La puesia
nasci pì sintimentu,
iu scrivu cu amuri
e sugnu cuntentu.

Nun sugnu un pueta
e mancu n'allitratu,
si sbagliu a scriviri
speru di essiri pirdunatu.

Si 'stà scrittura
nun nné di tò gradimentu,
nun sparlari
nun ricavi giuvamentu.

Si vò propriu criticari ...
pensacci prima di giudicari.
Scriviri versi e falli rimari
nun 'né di tutti...Chi ti nnì pari ?.

Lu sulì di Lidu Valderici

A latu di monti Còfano
propriu a li pedi di Erics,
s'affaccia lu megliu sulì,
a mari di Lidu Valderici.

Ammoddu, jocu cu l'onda,
si gira, rumuria, canta,
jocu cu la schiuma bianca
e cu lu sulì ca 'm'incanta.

'Stu sulì allegru e brilanti
si spicchìa nnì la mè menti,
lu cori 'nfiamma e 'nfoca,
ardinu passioni e sentimenti.

Lu vulissi abbrazzari,
sèntiri di cchiù lu sò caluri,
lu vulissi accarizzari,
saziarimi di lu sò splinduri.

S'avvicina lu tramontu
e pianu-pianu scumpari,
mi godu 'stu mumentu,
dopu... chi piaciri c'è ristari.

Sutta un pedi d'aranciu

Tu, cu nà vistinedda gialla,
iu, vistutu tuttu di biancu:
d'un campu d'arencetu
a carizzi e vasati ti 'ncuetu.

Curcati mezzu l'erba,
sutta un pedi d'aranciu
cu li vucchi 'mpicciati
ristamu allammicati.

Iu ti levu la vistinedda,
tu la cammissedda mi levi,
senza nenti ristamu,
tutti dù nnì taliamu.

Isu la manu e cogliu 'n'aranciu,
lu spremu nnì la tò vucca,
ti vasu, ti vasu milli voti,
tremu! Tuttu lu corpu mi scoti.

D'amuri e d'aranci 'nì nutremu,
ogni vasata un spicchiceddu,
ogni spicchiceddu 'nà vasata,
accussì lesta vola la jurnata.

Mani manuzzi 'nì nnì stamu
e nnì l'occhi nnì vasamu,
tempu un nenti n'amamu
e d'amuri 'nì saziamu.

M'appiccicu gatu 'ni l'arbulu
pì pigliari l'aranciu cchiù grossu,
sciddicu, cadu, nun ccì vitti cchiù,
forsi svinni, nun capivu comu fù.

Tuttu scantatu grapu l'occhi
e mi ritrovu stinnicchiatu 'n terra,
comu un sturduto a talari lu tettu
propriu a li pedi di lu me lettu.

A lu scuru

A lu scuru,
senza chi 'nì taliamu,
li manu 'nì circumu.

'Nì li tuccamu,
'nì l'accarezzamu,
a toccu di musica jucamu.

Iu cu l'occhi chiusi,
tu nun sacciu comu,
cchiù forti 'nì li stringemu.

Chi magicu mumentu!
Pi un attimu 'nì taliamu.
Gridari vulissi ..."ti amu".

Sciatu mè

Taliannucci 'nta l'occhi
e dicennucci ti amu,
'nì la vacca 'nì vasamu.

Vulissi firmari lu tempu,
firmari 'stu mumentu
sazziarimi di 'stu sintimentu.

Oi, sugnu cu tia e 'nì godu,
dumani senza di tia, comu fazzu?
Sicuru amuri mè diventu pazzu.

Ti vulissi sempri cu mia sciatu mè,
ma nun ti pozzu aviri.
A chi servi campari? Megliu muriri.

Chi fimmina!

Vistuta cu un pantaluneddu
'na cammisa e un magliuneddu.
'Ni lu coddu teni 'na fasciacolla
'na bursetta e un zainu a tracolla.

Si ti mittissitu puru un birritteddu
parissitu precisu un picciutteddu.

Si nun fussi c'avissitu la facciuzza bedda
e li labbruzza duci comu du viscuttedda,
nun si vidissi ca fussitu veru fimminedda.
E chi fimmina! Gata, ntiligenti e bedda.

Picchì t'ammucci e nun fa vidiri nenti?
Vidu sulu li manu e du occhi splendenti!

Ti vulissi spugliari cu musica e canti,
scupriri li to biddizzi, ca fussiru tanti,
vasati ti nnì dassi milli senza scanti
amari ti vulissi comu un veru amanti!

Tutta ti inghissi di carizzi
assaporannu tutti li to dulcizzi
scòtimi pi capiri can nun è sonnu
svegliu sugnu, ma a nuddu vidu 'ntornu.

Fortunatu cu t'avrà sutta li linsola,
mentri io speru... nuddu mi cunsola.

Amicizia ... donu raru

Caru amicu, amicu caru,
si amicu quannu ti cummeni,
l'amicizia è un donu raru,
ma di chissa tu nun 'ni teni.

La 'mmidia ti mangia lu ciriveddu,
quannu l'atri godinu nun li digirisci
ti unchia lu stomacu e lu vudeddu
'nta li vini ha vilenu, lu capisci?

L'amicizia è fratellanza,
chidda ca nun 'n'ha tu.
Cancella 'sta 'ngnuranza
e nun ci pinsari cchiù.

Aviri n'amicu è 'na festa,
tenitillu, nun lu lassari cchiù.
Si di 'mmidia è china la to testa,
prega a Diu e l'amatu Gesù.

Amici cu amici vannu avanti,
tu cu la to 'mmidia va narrè-narrè,
amici veru, nun ci 'ni sunnu tanti,
chiddu chi perdi nun torna arrè.

Perciò caru amicu, amicu caru,
chiuditi la vucca e stringi li denti.
Fa divintari duci chiddu ca è amaru
pirchè la 'mmidia nun servi a nenti.

Lu vastuni di mè nonnu

Lu vastuni c'aviva mè nonnu,
d'ora in poi nun ci servi cchiù.
Nun ci passa mancu pi sonnu,
finì. Ormai nun ci pensa cchiù.

Di 'stu vastuni assà 'ni gudiva,
tanti vastunati di picciottu detti.
Me nonna era filici e ci piaciva,
quannu lu truvava sutti li cuperti.

Quasi ogni notti la vastuniava
passavanu uri di veru piaciri,
lu vastuni, cuntentu si 'ni stava
cuntuava e mà la vuliva finiri.

Cci sù vastuna d'ogni manera:
curti, logni, nichì e grossi.
Diritti, torti e a bannerà.
Bianchi, niuri, gialli e rossi.

Aviri un vastuni 'dintra è un piaciri.
Ma si duna fora quarchi vastunata
s'ava stari mutu e nenti a'va diri,
vasinnò la famiglia è cunzumata.

Fineru li tempi di là vastunati
quannu scattiava a cu degghè
ora li nonni si cùrcanu mazziati
scurdannusi di putillu fari arrè.

Fimmini beddi, schietti e maritati,
si truvati un vastuni ... nun lu ittati.

Fruttu di mari

Quantu è beddu d'estati lu mari!
Pari un mantu blù senza vozza,
tra tanti pisci ci su li calamari
tra tanti mitiddi c'è la cozza.

'Stà cozza, di lu masculu disiata,
è la natura di la fimmina purtata,
circata di l'omu pi 'na manciata,
parissi rigalata 'nveci è pagata.

Di nichì l'avivamu fissa 'ntesta,
pi vùdila ci vuliva un documentu,
si taliava e cominciava la festa,
si tucava e spariva nun mumentu.

Bedda, niura e 'ngiuittata,
è pronta pi essiri manciata,
sapurusa e ancora vagnata,
pò durari tutta la nuttata.

Di cozzi ccì nnè d'ogni manera,
la megliu è chidda di la mugliera.
'Sta sira "Cozzi a la maritata"
ccì nnè pi ora e pi tutta la nuttata.

Si nun vuliti cozzi disiani,
si vi mancanu, jitili accattari.
Si vuliti campari senza dannu,
manciati cozzi tuttu l'annu.

Li cozzi su 'na veru specialità.
portanu festa, allegria, e filicità.

Oi è Pasqua

Fina aieri lu Signuri era 'ncruci.
Celu niuru e tempu annuvulatu.
Oi, 'nveci, lu sulì fa cchiù luci,
oi è Pasqua Gesù è risuscitatu.

Nnì la chiazza vannu currennu
picciutteddi tutti cu li friscaletti,
scinninu, acchiananu friscannu,
aggitannu stindardi e fazzuletti.

Li granni cu li palii di li santi
nescinu di ogni chiesa a la lesta,
scinninu di la chiazza fistanti
purtannu allegria e gran festa.

Burgisi, mastri e duttura.
Avvucati, 'npiigati e 'ngignera.
Pinzionati e omini di cultura,
abbrazzati si ùncinu a filera.

Gridannu "largu-largu" currinu
facennusi spaziu tra li fedeli,
manu cu manu satànnu scinninu,
purtannu a spada San Micheli.

La Matri piatusa, ca murì Gesù,
cu lu mantu niuru fina 'ntesta,
lu chianci pirchè nun c'è cchiù
e nun capisci pirchè oi è festa.

Scinni currennu San Micheli
pi diricci ca sò Figliu è risortu,
Gesù è cu lu Patri nnì li celi,
ma ancora lu chianci pi mortu.

Pi d'voti l'Arcangilu cci lu dici,
ma nun cridi a 'sta nutizia purtata,
a la terza vota la Madonna è felici
e scappa currennu 'ntramuntata.

Jietta lu mantu niuru e v' satànnu,
tra battimani, musica e maschiata
vidi Gesù vivu e si v' ralligrannu,
si cc' ferma davanti felici e priata

P' trè voti si 'nghina cuntenti
la Matri a lu Figliu risuscitatu,
ringrazia lu Patri Onnipotenti
Gesù è 'ncelu vivu e acclamatu.

Chista è la Pasqua di lu Signuri,
prigàmu a li Santi 'n' ogni cantu,
Maria si 'ncontra cu lu Sarvaturi,
Patri, Figliu e Spiritu Santu.

L'urtimu rigalu

Vulissi dariti pi donu
'na cosa prizziusa.
Ti vulissi rigalari
un sciuri.

Un sciuri c'assimigliassi a tia.
Un sciuri ca si chiamassi
Rosa, Rosa,
comu si tu pì mia.

Chissu fussi
l'urtimu rigalu
chi ti putissi fari
'nì 'sta vita.

Lu vulissi
siminari
'nì là tò terra,
'nzèmmula cu tia.

Vulissi ca nascissi
pì essiri amatu,
comu iu
amu a tia.

Accettalu,
strincilu
a lu tò cori allegramenti,
è donu di cu ti ama veramenti.

Quannu tu nun ci s'ì

Quannu tu nun ci s'ì,
la casa è senza mura.
Ti cercu, ma unni s'ì ?
Nun sentu cchiù rumura.

Comu 'sta casa
lu mè cori è votu.
Nun c'è cu mi vasa,
sugnu 'n'omu 'ngnotu.

Di la matina a la sira,
anima mia, pensu a tia.
La vita vali mezza lira
si tu, ora, nun si cu mia.

Ti sonnu ogni notti e ti viù,
t'abbrazzu e mi cunortu.
Sentu lu tò respiru, amuri miu,
lu cuscinu è lu me cunfortu.

Allestiti a veniri sciatu miu,
senza tia nun pozzu stari.
Staiu mali quannu nun ti viù,
veni! Ti vogliu di cchiù amari.

Ti amu assà pi stari senza tia,
perciò natra vota nun ti 'ni iri.
La lontananza nun 'n'è pi mia,
stammi vicinu e fammi giuiri.

L'estati

Avvampa lu cori
di li 'nnamurati
la casda estati.

Porta un saccu di surrisi
a li nichianti e a li siddiati,
amuri e paci a li sciarriati.

Fa gràpiri lu pitittu
di amuri scurdati,
di ricordi fatati.

'Nmezzu l'ondi di lu mari
stritti-stritti, abbrazzati,
si ioca a li maritati.

Di la matina a la sira,
si danna milli vasati,
pi l'ardiri di l'estati.

Li fimmini a la chiazza
passianu scullati e 'ngiuvittati,
cu abiti trasparenti, raffinati.

Li masculi allegri e fistanti,
allicchittati e 'mprofumati,
talianu, lancianu ucchiati.

Cu a durmutu, s'addiviglia.
Tra schetti, ziti e maritati
ora, c'è aria d'innamurati.

Masculi e fimmini,
vucca cu vucca 'mpicicati,
si stringinu allammicati.

Notti di focu e chini d'amuri,
Sazzii, sudisfatti e arricriati
ringrazianu ca vinni l'estati.

Lacrimi e suffirenze

Lacrimi di sangu ca
Cristu fici scurriri
nnì la terra
pi sarvari
natri piccatura.

Cristu 'nchiuvatu 'nta la Cruci
di lu stessu
malignu omu
ca lu Nostru Patri
crià.

Ancora oi,

chianciamo lacrimi di sangu
pi li nostri figli ca si perdinu
pi lu iocu, pi li sordi,
pi la priputenza,
pi la 'ngnoranza,
pi la droga, pi lu putiri,
pi la guerra.

Esisti la paci ?

Si esisti !

Bisogna sapilla circari,
sapilla pigliari,
falla nostra,
purtalla 'n casa
e offrilla
a cu nun 'né capaci
di avilla.

Lu munnu e la vita
fussiru cchiù beddi
si 'ni ognunu di natri
ci fussi macari 'na sula
scardicedda di paci.

'Na taliata pinitranti

'Na taliata pinitranti
ca mi fa cu li tò occhi,
dissita tutta l'arsura mia.

Quannu arridi, li tò occhi brillanu di 'na luci
c'abbaglianu li mè.

Mi cunfunnu.
Ti staiu davanti,
ma nun ti vidu.

Sentu un scutimentu
di tuttu lu mè corpu,
tremu comu 'na foglia.

Chiudu l'occhi.

Ora ti vidu !

Si ! Si !
Ti vidu !
Si tu !

Pani, viscotta e farinedda

Dù fimmini attraenti e dù beddi,
vinninu pani, pizza e viscutteddi
'nvia Bonifaciu, 'npunta cantunera
tra via Crispi e la strata la Fera.

E' lu furnu di li fratelli Faldetta,
cu li fimmini narrè la vetrinetta,
matina pi mattina tutti 'mpupati
cu camici bianchi e labbra pittati.

Di Faldetta, panifici, cci nni su assà,
chisti su artigiani, furnara, di qualità,
fannu lu pani beddu cottu ca pari oru
sunnù cugnati, frati, niputi e soru.

Di li quattru, una è Maria, la principina,
l'atra Carmela, l'atra ancora Filippina,
po cc'è Giuggiuzza nicaredda e bedda,
tutti vinninu pani, viscotta e farinedda.

Li clienti arrivanu 'nbicicletta,
cu a la pedi, cu 'n motoretta,
s'accattau lu pani ogni mattina,
donna Cuncetta e la zia Pippina

Ti dunanu un viscottu cu lu surriseddu,
su gentili cu tutti, puru cu lu vicineddu,
ti firrii cascia-cascia pi staricci cchiossà
pi li biddizzi, cortesii e pi li loru bontà.

Trasi p'accatari pani, ova e pizza,
ti talianu, ti cunfunni, pi la biddizza,
torni 'nintra senza accattari nenti
manci sulu frutta e strinci li denti.

Si vuliti essiri beddi senza midicina,
manciativi spissu pani cu la livatina,
si lu mancianu Pasquali e Antonietta,
lu megliu lu fa lu panificiu di Faldetta.

Piccatu !

Li mani,
e li vucchi stritti-stritti,
lu ventu 'n'accarizza
li corpi nudi fitti-fitti.

La luna
'ni fa lustru, ma si 'midia,
lu mari rumuruso si rutulia,
la brezza 'ni vagna e 'ni casdia.

La nuvula
a la luna si strinci,
lu mari a 'n'onda s'abbrazza,
lu celu di russu si tinci.

La to vucca,
casda, mi vasa tuttu,
po la me vasa a tia,
gustannu lu veru fruttu.

Lu sciumi
trasi 'nta lu mari lentu,
è musica duci di milodia,
setti noti di veru gudimentu.

La notti
passa a lu iornu 'n'un cantu,
ma, un forti sonu stranu
rumpi 'stu veru 'ncantu.

Tuu ... tuu ... tuu ...,
sulu sugnu assittatu,
la linia cadì !
Piccatu !

Làssami cu lu Signuri

Arràssati !
Pirchì mi 'ncuèti
di la prighiera a Diu !
Diu è vita,
Diu è gioia,
Diu è amùri.
Nun ci arrinesci
a purtarimi cu tia !
Vatinni !
Nun cridu a la to putènza,
nun mi 'nganni cu li to
finti magari,
nun arrobbi lu cori mè.
Mi spunti comu 'n'Àngilu
ma duni sirincàti d'òdiu.
Iu 'nveci,
vogliu amari
a cu nun mi ama.
Sulu lu Signuri
po' dari chistu.
Perciò,
nun tintàrimi,
senza vènimi appressu,
sparisci di la menti.
Parlerò cu lu Signuri.
Ti farò mannàri a la lesta
'nzèmmula a li tentazioni,
a la marvaggità, a la 'mmìdia,
all'òdiu, a la guerra.
Cu Diu, 'ni 'sta vita
e 'ni l'atra ca 'ni darà
ci sarà sempri paci, amùri,
gioia e un mari di felicità.

L'arsura

Un pezzu
di terra arsa
chiedi a 'na nuvola:
<< ti vulissi
rigalari un sciuri,
ma si nun mi vagni
li labbra,
mancu 'na vasata
ti puzzu dari >>.

Chiddu chi appi di fari lu fici

Ma chi mi teni ancora ccà ?
Nun ti nn'adduni ca nun haiu
cchiù scopu di ristari ?
Chiddu chi appi di fari lu fici,
nun mi resta ccchiù nenti di fari,
perciò vidi chi a cuminari.

Prima nun ti cridiva, ma ti
mittisti cu la minutidda,
oi, dumani, oi, dumani,
ca ora ti cridu e cu gran fidi.
Perciò fammi 'stu piaciri,
chiamami a tia, nun ti 'ni iri.

T'haiu vulutu circari iu,
lassannu tutti cosi e truariti,
ma nun haiu avutu curaggiu
e nun'haiu mancu ora,
ora ca vulissi stari cu tia veramenti,
siguennu li deci cumannamenti.

Ora ca ti sentu cchù vicinu,
chiamami ! Chiamami proprio ora,
di 'stu mumentu, prima di finiri
e mettiri lu puntu di 'stu versu.
Veru ogni dubbiu si cancellassi,
la verità di la tò prisenza ristassi.

Lu puntu lu misi, ma nun succidì nenti
ti cridu sempri, a tia e a l'Onniputenti.
Chiamami ! Chiamami ! Chiamami !
Si nun mi vò a lu tò sciancu,
ettami unni dagghè, unni ti piaci,
ma levami di ccà, fammi stari 'n paci.

Certu, lu sacciu, lu munnu
è bellu, lu vidu, mi nnì godu,
c'è lu sulì, lu celu, lu mari,
ma si nun si pò dari tecchia
d'amuri pi putiri amari,
'ni 'sta terra, chi ccì campu a fari ?

Ancora nun sapi nenti

Sugnu di 'na picciotta 'namuratu.
Avi la vucca duci e l'occhi splendenti,
di la sò biddizza sugnu 'nfatuatu,
ma ancora idda nun sapi nenti.

Nun sapi l'amuri ca cci vogliu.
La taliu e mi pari ca capisci.
Ci vulissi fari leggiri 'stu fogliu
pi vidiri si arrussica o 'mpallidisci.

Vulissi ca di 'st'amuri idda lu capissi,
pirchè spiranza di diriccillu nun ci nnè.
La taliu 'mmucca, quasi-quasi ci lu dicissi,
è troppu bedda ca uguali nun ci nnè.

Avi li labbra russi e l'occhi pittati,
lu pettu beddu biancu sviluppatu,
li guanci beddi roselli 'ncipriati,
lu corpu beddu lisciu livigatu.

L'avvicinu e sentu lu sò profumu.
Ci toccu la manu e pigliu la scossa.
Mi sazzù sulamenti di lu fumu
senza manciari carni e mancu ossa.

La taliu allammicatu.
Idda mi talia vidè.
Pi idda staiu cadennu malatu.
Pi idda vulissi nasciri arrè.

Lu dannu sapiti qualè ?
ca idda è maritata
e iu vidè.

Du còccia di grànnuli

Dintra un càlici
di vitru russo,
du còccia di grànnuli
spartùti l'uno di l'atru
aspèttanu d'addivintàri
'na sula ùnica gùccia.

Gùccia ca dissità
l'arsùra, la smània,
l'ardìri, l'amùri.

Gùccia d'amùri
spartuta di tanti gùcci,
aspetta 'nsilènzio
la forza di 'n'onda
pi purtàlla
all'atra sponda.

Ùnica e sula, è china d'amùri,
pari nica,
ma è cchiù granni di lu mari.

Iu sugnu prontu

Era un piaciri pi ccu ti taliava
viditi vistuta cu la vistinedda
niura tutta bedda scullata.
Ogni fimmina ti 'mmidiava.

Lu pettu s'affacciava
beddu biancu e armuniusu,
tra 'na girata e l'atra
tuttu ti s'annacava.

Quannu ti vitti ristavu allucutu,
mi cunfunnivu di 'na tali manera
ca nun potti diri ne tri e ne quattru,
ristavu tisu, allammicatu, e mutu.

Ti taliavu di la testa a li pedi,
mentri a 'menti me diciva:
chi si bedda, si duci comu lu meli,
Pirchè a mia nun ti cuncedi ?

Si mi dassitu 'na spinta,
partissi 'nquarta,
iu sugnu prontu,
sta a tia mettiri la quinta.

Nenti a ma cuntari 'ni 'sta vita?
Perlumenu dicemu:
ca iu misi la quarta e tu la quinta.

Si ti chiamassitu ...

Si ti chiamassitu Giuseppina,
ti vasassi di ora finu
a 'stasira, a 'stanotti
pi finiri domani matina

Si ti chiamassitu Rosetta,
ti dassi trentamila vasati
tutti boni e sapurusi,
ca mancu uno si 'ni jetta.

Si ti chiamassitu Enza,
decimila vasati ti li issi
a piscari 'nfunnu a lu
mari cu la lenza.

Si ti chiamassitu Maria,
ti dassi cincumila vasati
cchiù natri trimila
ogni vota chi pinsassi a tia.

Si ti chiamassitu Carmela,
ti dassi settimilatricentuvinti
vasati e pittassi la to
vuccuzza supra 'na tela.

Ti chiami Angela e si la me vita
vasati ti nn'aiu datu
trentamilionasettecentotrentatrì
moltiplicatu li deci di li ita.

Ti vasu ancora e tu mi dici fallu arrè
ormai, quantu su, persimu lu cuntu,
a 'stu puntu, lu sa chi ti dicissi ?
Cancillamu tuttu e cominciamo arrè.

Addubba cu 'stu maccicuni

Caru amicu, scrivisti quattru
versi e ti pirdisti.
Iu nun n'era mancu
natu comu poeta
e tu eratu già persu.

Iu poeta nun mi ci sentu, ma tu
ca ti ccì senti, nuddu ti giudica tali.
Scrivi ancora ma nuddu leggi li to
scarsi e sciancati versi.

'Na vota circavu aiuto nnè tia
e tu, di caru amicu, mi dicisti di sì.
Mi cunnucisti dicennumi
oi dumani, oi dumani
ca l'aiuto chi appi bisognu
nun mi lu dasti.

Ora caru amicu, ogni vota ca senti
ca vinciu quarchi concursu
t'acchiana na gran'mmidia
ca ti scatta lu cori.
Si nun la 'ntisu, vidica vincivu
lu primu posto pi lu librettu
chi scrissi, chiddu ca tu dicivatu
can un valiva nenti.

Perciò caru amicu ti dicu
ca di sti sorpresi
cci nnè sarannu ancora,
perciò, piccamora
addubba cu stu maccicuni.
Si ha curaggu rispunnimi a tono,
a versi no, pirchè nun li sa
mettiri unu 'capu a l'atru.

Scrivi a muzzu pi comu
a scrittu sempri.
Eratu un caru amicu,
ma ti pirdisti strata-strata.
Circavu di recuperariti
ma nun ci potti.

Ora si sulu scunsulatu e persu.
Aiutati tu stesso pirchè nun
trovi cchiù a nuddu
chi ti po aiutari.

'Mpronti 'ni la rina

Taliu li mè 'mpronti
lassàti 'ni la rina

Vicìnu-vicìnu quasi
a sfioràrisi, nnì vidu
natri dù cchiù nicarèddi.

Un film ammunèntu passa
'ni la me menti. Riassapùru
ddi àttimi di tinirizza.

Tuttu 'nsèmmula, 'n'onda
cancèlla tutti cosi,
lu film finisci.

Isu l'occhi
e nun vidu
cchiù nenti.

'Nill'aria ristà
sulu 'n'àlitu di ventu
e lu cori cuntèntu.

Cu l'occhi chiusi

Mi nnì vogliu iri.

*Mi nnì vogliu iri
cu l'occhi chiusi.*

*Mi nnì vogliu iri
cu l'occhi chiusi,
'n'intra 'ni mia.*

'Na farfalla di sita russa

Cu tecchia di stoffa
di sita russa, piegata 'ndù,
cu l'ali chiusi, tagliavu 'na farfalla.
La pusavu 'ni un sciuri
di gelsuminu,
cu l'ali aperti vulava vicinu-vicinu.

'Ni l'ali, ci scrissi
lu to nomu,
ci misi puru amicizia
gioia e tantu amuri.
'Sta farfalla mi pari vera
fa sciavuru di primavera.

La stringiu nni li mani,
pi nun falla scappari,
haiu paura ca si pirdissi
e nun ti putissi diri
'ntrappulata nni quarchi scogliu,
l'amuri ca ti vogliu.

La misi mezzu un libru di poesii,
è lu giustu postu unni putiri stari.
Ogni tantu lu grapu e la taliu,
mi pari ca la sintissi parlari
dicennumi ca vulissi vulari.

Comu capita ti la fazzu vidiri.
Si ti la pigli, è signu d'amuri,
si la lassi è signu d'amicizia.
Nenti cangia di comu decidi,
tu, resti sempri nni lu me cori
fa comu vò, l'amuri nun mori

Chista è la menti di n'artista
abbunnatu di tanta fantasia,
scrissi 'sti versi, pinsannu a tia.

Nun c'è cchiù 'na muddica d'amuri

Cancianu li tempi e cencianu li modi,
cancià puru lu sulì. Ora lu sulì è cchiù scuru,
nun fa cchiù ddu bedduu lustru chi faciva prima.
Lu patri cu lu figliu, nun si scancianu cchiù 'na parola,
maritu e muglieri, chiossà su sciarriati ca 'mpaci,
frati e soru, mancu si talianu,
tra vicini di casa po ...
Chi stà succidennu!
Unni sù li valuri!
Unn'è l'amuri!
Unn'è l'affettu!
Unn'è lu rispettu!
Nun nnì capemu cchiù.
'Na vita pi furmari 'na famiglia d'amuri, pi po...
Ognunu la pensa a modu sò.
Ormai, ognunu si senti Diu,
ma mancu sannu d'unni hannu a cuminciari.
Tutti ora su sperti, li fimmini po...
Ormai hannu lu stipendiu e cumannanu iddi,
già ca hannu cumannatu sempri, figurati ora,
ca si guadagnano li so sordi,
si, li so sordi,
si,
pirchè li sordi chi guadagnano su so.
Dicinu:
"chisti su sordi me e nnì fazzu chiddu ca vogliu".
Mentri cu li sordi di lu maritu, ca su scuttati
a suduri di sangu, chisti, su di tutti la famiglia,
nun sulu, ma cci parinu sempri picca e sparti
ti dicinu ca nuu nnà saputu fari nenti nnì sta vita.
Tantu amuri, tantu sdegnu.
Ormai capivo, la me vicchiaia nun sarà
comu chidda ca passà me matri e me patri.
Ora li tempi cenciaru,

nun c'è cchiù 'na muddica d'amuri.
Ma prima ca mi ittassiru
comu unu ca nun servi cchiù,
sugnu sicuru ca lu Signuri,
vidennu stu poviru omu ca tutti l'uri,
matina e sira, iornu e notti la fini spera
mi piglia prima ca finisci 'sta primavera.

Panuzzu

Panuzzu
muzzicatu di tanti denti,
nun ti lamenti, nun dici ma nenti.

Panuzzu
cottu si beddu duratu,
quantu tribù, popoli ha sfamatu !

Panuzzu
si cchiù duci quannu si scuttatu
sazzii d'amuri a cu t'ha manciatu.

Panuzzu
di lu furmento si ricavatu,
si donu di lu Signuri criatu.

Panuzzu
si Santu 'ni lu Sacramentu,
l'Ostia 'nì duni d'un calici d'argentu.

Panuzzu
si lu corpo di Gesù,
cu avi fidi a tia, nun mori cchiù.

Zuccaru filatu

Pi la fera, un firaru,
arridennu mi dissi:
l'assaggiassi è
zuccaru filatu,
nun lu paga è rigalatu.

Mi parsi malu
e l'accittavu.
Mi lu misi un pocu mucca,
è 'na veru spicialità,
ammumentu squaglià.

Nintra; misu 'nta na sdraia,
cu l'occhi chiusi,
mi parsi di truarimi 'ncapu
ddu zuccaru filatu ca vulava,
nun sapennu unni mi purtava.

Cu lu suli ca cannariava,
mi purtà 'nta 'na stidda,
nnì la stidda di mezzìu.
Nuddu la vidi, ma c'è,
nun si fa taliari di cu dagghè.

C'era un lustru ca
piciavanu l'occhi.
Arrivavu giustu 'ntempu di manciari.
C'era 'na tavulata ca nun finiva mà,
iddi, già eranu iunti a mità.

'Ncapu dda tavula
c'era ogni grazia,
c'era lu beni di Diu.
Cu manciava di ccà
e cu viviva di ddà.

Comu trasivu, mi ficiru 'na festa,
pi primu San Petru; subitu mi dissi:
cu 'stu mazzuni di chiavi
comu veni arrè, po iri unni vò,
piccamora nun 'ne tempu tò.

Assèttati e mancia cu natri.
Eranu tutti canuscenti,
tutti amici e parenti.
Cu mi salutava di ccà
e cu mi chiamava di ddà.

C'era lu dutturi, lu scarparu,
lu parrinu cu tutti li fedeli,
l'avvucatu, lu varberi,
lu sartu, lu 'nfirmieri,
l'onorevoli e lu 'ngigneri.

Chiddu di lu giru mi dissi:
vidi comu si campa ccà ?
Ccà nun c'è, ne droga, 'ne guerra,
c'è paci, nun c'è unu chi si sciarria,
nun c'è odiu, e nuddu si 'mmidìa.

La cosa cchiù bella lu sa qual è ?
Ccà, nun ci su sordi,
nun s'accatta nenti,
chiddu chi voli unu si piglia,
semu tutti 'na famiglia.

Subitu ci rispunnivu!
A ccà 'mparadisu semu!
San Petru, mi dissi: bravu,
ora sì ca lu capisti, facisti
tanta strata e nun ti pirdisti.

Saluta a tutti pirchè ti nnà gh'iri,
nun nnè ura pi tu stari ccà.
Comudu piccomera 'ni la sdraia
un gridu a l'aricchi mi fici satari,
dicennumi, vattinni a travagliari.

A menti me pinsavu:
ma pirchè m'addivigliavu!

Amari, amuri amaru

T'amavu,
tamassi,
si tu nun
amassitu
a natru.

Nun ti pozzu cchiù amari,
nun ti pozzu cchiù vasari,
nun ti pozzu cchiù circari,
ti pozzu sulu udiari.

T'amavu, lu sacciu iu
comu ti disidiravu.
Nun t'amu cchiù,
tradisti lu veru amuri,
ora, avìri peni e duluri.

Vattinni, nesci di la me vita.
Sula, scunsulata e persa
li tò iorna meriti passari,
lu manciari vilenu t'av'a fari.

Pi tia sugnu cchiù chi pazzu.
Si t'arrivu a vidiri t'ammazzu.
Nun ti scantari, nun aviri timuri
è sulu la forti rabbia di l'amuri.

Pi tia pigliavu 'na cotta,
ora pi mia, tu, si morta.

Dimmi ca ti pintisti

Ti cercu, ma nun ci s'ì,
ti vogliu, ma nun ti trovu,
haiu desideriu d'aviriti,
'mpazzisciu pi tucçariti.

Ti vulissi nuda davanti a mia
cu li tò capiddi logni, durati.
T'accarizzassi sutta la schiena,
amariti, anchi si ora mi fa pena.

Pirchè amuri miu mi lassasti,
pi un riccu vecchiu mi canciasti,
l'amuri chi ti detti nun 'n'avi pari,
chistu iddu nun ti lu pò mai dari.

Pi tia mi ittassi sutta un trenu,
accussì sulu ti putissi scurdari,
sunnè oi è domani lu fazzu
è megliu di divintari pazzu.

Pirchè fimmina maliditta mi tradisti,
ti vogliu ancora, dimmi ca ti pindisti.

Sulu a tia haiu amatu

Di ddù iornu ca mi lassasti,
lu me cori divintà na petra.
T'amavu, ma tu, mi 'ngannasti,
l'amuri e la vita mia marturiasti.

Ora sugnu sulu, arridduttu
cchiù peggju d'un stracciu,
nun vogliu cchiù campari,
'na mala cosa a cuminari.

Mi vogliu ammazzari,
vogliu muriri, nun pozzu
viviri senza 'na tò carizza,
senza la tò biddizza.

Amuri, a tia sulu hai amatu,
tu, fusti la prima ca haiu vasatu,
nun ci nnì sarannu cchiù atri novi,
dumani, si mi cerchi nun mi trovi.

'Nta li matinati 'n'omu truaru
'ncampagna 'ntà un'arbulu 'mpiccatu,
'ni lu pettu un cartellu aviva appizzatu.
"Pi tia lu fici, sulu a tia haiu amatu".

Ricordu di scola

Quant'è beddu 'stu libbriccinu
mi ricorda quann'era nicareddu,
mi taliu tutti li cumpagni vicinu,
bravi e quarcunu puru sciccareddu.

Lu maestru, sempri arrabbiatu
spiegava poesii e divisioni,
ogni tantu mancava, era malatu,
diciva di irisinni 'npinzioni.

Lu taliamu cu mè muglieri,
mi dici ca era lu cchiù beddu,
ci pensu, avi assà ma pari aieri
'ntesta purtava un birritteddu.

Me figliu voli taliari vidè,
voli sapiri cu sugnu iu
sò soru cci dici talè unni è
taliannu 'stu ricordu miu.

C'è mè niputi ca è appena natu
si chiama comu sò nonnu, Nicola
nun ci 'nteressa, voli essiri annacatu
ma pi mia pari ora ca ivu a la scola.

Bravi ca stampastivu 'stu libbriccinu,
cu sta scusa semu 'nsemmula e vicinu,
natri ca taliamu è 'na cosa troppu bella
grazi a Enzu Miniù e a Peppi Cardella.

Ti lodu e ti cantu

Ascuta, oh Signuri!
'Sti prighieri di 'stu figliu,
sù di spasimi e dulura,
manna la paci ca la pigliu.

Nun servi a mia
ma a 'stu munnu,
nun c'è cchiù amuri né amicizia,
c'è sulu odiu chi gira 'ntunnu.

Guerra, droga e omicidi,
ormai, si cuntanu a decini,
ci voli quarcunu ca decidi
pi amarinni tutti e stari vicini.

Tu sulu po' aggiustari 'stu munnu,
Tu si lu patruni di 'stu regnu,
trova 'sti maligni unni sunnu,
cunvertili a l'amuri di lu tò segnu.

Prima chi moru, dammi 'sta gioia
di vidiri 'stu munnu tuttu 'mpaci,
cantassimu 'nsemmula la tò gloria,
cumpresu li putenti e l'incapaci.

Signuri! Semu tutti nni li tò mani,
spirannu ca 'stu munnu canciassi
nun dicu oi e mancu dumani,
ma mancu troppu tempu ca passassi.

Iu ti pregu, ti lodu e ti cantu
Patri, Figliu e Spiritu Santu.

Aspitannu l'atobussi

Staiu partennu,
tri figli comu l'oru
staiu lassannu.

Mi salutaru 'mmezzu la strata,
davanti lu purtuni,
cu li manuzzi isati,
chini di scantu,
cu l'occhi vagnati
di chiantu.

Mè muglieri si li stringiva
stritti-stritti a lu sò pettu,
cu lu cori tristi e a luttu.

Pi l'èstiru staiu partennu,
'ncerca di travagliu,
pi sfamari 'sti 'nnuccenti
pi falli crisciri e studiari,
pi daricci 'n'avviniri,
di la giusta via caminari.

La mugliredda mia
staiu lassannu,
a stari senza idda quarchi annu.

Chi famiglia sdisulata è la mè.
Aiutami Signuri ! Aiutami !
Iu pregu la Madonna e a tia vidè.
Fammi gòdiri 'sta famiglia
nun mi mannari luntanu,
guidami, tenimi pi 'mmanu.

L'atobussi arrivà !
Pensacci tu
matruzza mia !

Camina, accelera, sparisci,
perditi ntà 'sta via,
'mmezzu 'sta fudda.
Nun partu, nun mi nni vaiu,
a costu di manciari
pani e cipudda.

L'atobussi lenta passà.
Si nnì ì, nun la firmavu,
a la mè casuzza riturnavu.

A lu stessu mè paisi
truvavu travagliu.
A li novi misi nascì mè figliu,
lu chiamavu Furtunatu,
ora è granni, laureatu,
avi famiglia ed'è sistimatu.

'N'amàmu tutti e semu filici,
pregu e ringraziu lu Signuri
di 'sta grazia chi mi fici.

'Na stritta di manu

'Na stritta di manu
nun nnè nenti
si è tra amici, e parenti.

'Na stritta di manu
è 'mpurtanti
si è tra ricchi e minticanti.

'Na stritta di manu
è 'nteressanti
si è tra 'namurati amanti.

'Na stritta di manu
è pacifista
si è tra democratici e comunista.

'Na stritta di manu
è appostu cu la cuscienza
si ti la stringi Sua Eminenza.

'Na stritta di manu Misiricordiusa
è chidda
ca nun po' stringiri mà.

La manu ti la posa nnè la frunti
e cu lu segnu di la Cruci chi ti fà
ti benedici pi tutta l'eternità.

Iu ci cridu
vatri criditicci vidè
cu avi fidi a Diu rinasci arrè.

Lu friscalettu

Cc'era la chiazza china,
passiava cu Carmilina,
idda a la fera mi portò.

Mi dissi ti fazzu un rigalu,
pi mia nun c'è nenti di malu,
scegliti chiddu chi tu vò.

Mi scigliu un friscalettu,
di misura era perfettu,
idda cu piaciri me lo do nò
cu tuttu lu cori mi baciò.

Mi dumannà: lu sa sunari?
Si! Ora lu fazzu friscari,
mi rispunnì: adesso nò.

Ti lu rigalavu cu affettu,
'sta sira lu sunamu a lettu,
avemu 'na nuttata caru Giò ... ggiò .

Piccamora mettilu ddocu,
sugnu divintata un focu
posalu 'ncapu lu co mò,
pò lu sunamu finu a quannu vò.

A la sira ni nnì emu a ballari,
stritti idda 'ntisi 'na cosa vibrari
cu l'occhi spirticchiati m'addomannò

Mi dissi chi ccià ddocu,
è casdu comu lu focu,
tutta allarmata idda ccì pen ... zò.

Cci vinni un scutimentu,
trimava di lu spaventu,
si chiddu è 'ncapu lu co mò,
dimmi si lu pusasti si o nò.

Ogni unu e d'ù vuliva sunallu,
ci piaciva, s'imparà a friscallu,
di ddà ballata la testa ci strammò.

Lu friscalettu si misi a sunari,
idda si cumincià a 'nturciuniari,
e quasi-quasi si spez zò.

Idda sempri lu vuliva sunari,
divintà peggju di sò cummari
ca trasì senza chi bus sò,
lesta-lesta idda si l'ammocciò.

Divintavu un gran sunaturi,
lu vonnu sempri, tutti l'uri,
dissi facitimi arripusari un pò.

Ognuna dici ca lu fa cu affettu,
nun mi dunanu cchiù rizzettu,
lu friscalettu ormai stò nò.

Lu purtavu pi accurdallu,
dissi: " ccà è cosa di ittallu ",
accussì finì per..... ciò,
lu friscalettu si spasciò.

'Na petra

Comu si po' parlari a 'na petra d'amuri.

Comu si dici a 'na petra ti vogliu beni.

Comu po' 'na petra capiri cu sugnu

Ascutami ! metticci lu cori.

Lu granatu

Lu granatu fruttu di lu criatu,
si lu grapi prima ca è maturatu
parinu tanti denti 'mpiccati
tutti bianchi e allucintati.

Un cocciu di granatu
pari un denti 'livigatu
si li metti tutti 'nfilera,
ha furmatu 'na dintera.

Si 'ni cunti di unu a trentadù,
'mmucca nun ci nnì vannu cchiù,
ti trovi la vucca tutta china
cu 'na bella cascittina.

Li coccia di lu granatu
nun cci nnè unu cariatu,
nun pò manciari nenti
pirchè chissi nun su denti.

Ti cunsigliu di sicuru
grapilu quannu è maturu,
mancianni quantu nnì vò
ma cu li denti tò.

A lu Signuri

Prima ca moru, serviti di mia,
dimmi chi pena a scuntari,
pi aggiustari 'stu munnu,
e pi natri a tia putiri amari.

Pi sacrificiu universali,
si vò a mia, vegnu,
pozzu vèniri ora stessu,
campari, nun sugnu degnu.

Ti vulissi sèrviri ora,
ora ca sugnu 'nvita,
pi diri ca Tu ccì s'ì
ca nnì criasti cu la crita.

Oh Cristu! Aiutanni,
dacci cchiù amuri 'ni 'sta terra
teninni stritti a lu to pettu,
ccà cc'è sulu odiu e guerra.

Iu sugnu prontu! Dimmi cà 'ffari,
sulu Tu, o Signuri, ci po' sarvari

'Narrè 'na finestra

'Narrè 'na finestra, misu di latata,
taliu l'acqua ca di 'ncelu cadì fitta,
è bianca, pura, limpida e distillata,
pi la campagna è acqua biniditta.

Lu viddanu contenti si rallegra,
vidi la zagara megliu girmugliari,
lu Signuri cci penza e abbrivira
dd'aranci su cosa d'ammirari.

'Ntà li vitra di li finestri,
ancora mezzi appannati
vidu gucci uncisi unu cu l'atri.
ca scinninu comu 'nnamurati.

Chiovi, l'acqua 'nterra cadì lesta
un sonu, 'na musica si senti
di tanti ciancianeddi 'nfesta
ca vannu satannu allegramenti.

Lu chioviri furmà tanti lavinara,
scinninu, currennu versu mari
lu viddanu lestu-lestu si ripara
sutta 'na manta p'accumudari.

Ringrazziannu lu Signuri,
l'acqua fu bona e abbunnata
lu viddanu Lu prega tutti l'uri
pi aviri smpri 'na bona annata.

A la sira stancu arriva a la casuzza
vasa la muglieri, e abbrazza la nicuzza.

Lu piccatu

Quanta genti si cridi 'nnuccenti
fannu la carità a li puvureddi
pò, fannu mali a tanta genti
e ammazzanu omini comu aceddi.

Genti ricca, 'struita, 'ntilliggenti
pensa sulu pi idda, pi beni stari
lassanu mòriri la povira genti
po, vannu 'nchiesa a prigari.

Comu si v` davanti a Diu
a pigliari lu Sacramentu ?
Semu tutti piccatura, lu primu iu
'nginocchiu di li piccati mi pentu.

" Cu di vatri nun 'nn'avi piccatu,
tira la prima petra contru d'idda ".

Nuddu tir` la prima
petra contru d'idda.

Lu Signuri nun la giudic`
ci dissi "nun piccari"
e la mann` ,
pi la giusta via caminari.

A lu Signuri lu prigamu
a tempu di bisognu,
'nveci uncemu li manu
e 'mploramulu ogni iornu.

Iddu 'nn'ascuta, nnì vidi
e nnì senti
avemucci fidi,
prigamu, genti.

Pirdunanni, Signuri, di 'stu piccatu.
Oi, dumani e 'ni li seculi, sii ludatu.

Lu Bammineddu

'Na notti di celu stidatu,
mentri taliava appassionatu,
di li stiddi, una era la cchiù brillanti
avìa la cuda longa d'oru luccicanti.

Tuttu 'nsemmula si misi a caminari,
mi diciva, seguimi, nun mi lassari.
Di notti cu lu friddu ca si gilava,
la seguivu pi vidiri unni mi purtava.

'Nta la via truvavu tanta genti,
siguivamu dda stidda lucenti,
ogni pirsuna chidiva unni emu
si rispunniva, avemu fidi e siguemu.

Caminannu pi tutta 'na nuttata
arrivamu 'nta na grutta malandata,
dda stidda si firmà 'ncapu la grutta
'lluminannula di 'ncapu finu a sutta.

'Mezzu lu vò e lu sciccareddu
nascì lu veru Bammineddu.
San Giuseppi e la Madonna a lu latu
aduravanu 'stu figliu miraculatu.

Tanta genti arrivata di luntanu,
si faciva la cruci cu la manu
dicennu chissu è lu veru Misia
prigamu tutti a Gesù e a Maria.

Chista fù na notti tutta particolari
di 'sta nascita ma nnà mà scurdari,
pi tuttu lu munnu fù 'n'eventu fatali
chistu fù lu iornu di lu Santu Natali.
Gesù nascì e ccì facemu un cantu,
Patri, Figliu e Spiritu Santu.

Smania d'amuri

Comu fazzu? Nun pozzu cchiù stari
si nun ti sentu pi 'na iurnata.
Sulu cu tia vogliu palari
tu e tu si la me 'namurata
D'amuri speru can un si mori
pirchè ormai tu si 'ni lu me cori.

Nun fari soffriri
'stu poviru criauturi
macari fammi capiri
di spirari di lu to amuri.
Chistu, cridimi, nun è jocu
ti sentu e ardu comu lu focu.

Tu, bedda me, si comu lu ventu
nun ti pozzu mancu abbrazzari
pirchè nu ti vidu, però, ti sentu
ti vulissi vasari, accarizzari, amari.
Sulu la notti ti vidu 'nta lu sonnu
e pregu ca nun divintassi iornu.

Cu la smania mi trovu scummigliatu
senza linzolu, né coperta e né cuscinu,
di lu friddu sugnu tuttu agghiacciatu
cu lu to sciatu mi casdii lu me coricinu.
Sentu lu to sciavuru, pupidda bedda
nù li labbra ti dugnu 'na vasatedda.

Ti stringiu, ti vasu tutta, t'abbrazzu,
sentu la smania ca 'm'acchiana 'ntesta,
lu sfogu lu trovu sulu 'ni lu matarazzu
nù lu sonnu pari tuttu veru, è 'na festa.
Menumali ca 'sta notti ti sunnavu,
fu smania d'amuri, ma iu veru t'amavu.

Arsu di siti

Arsu di siti sugnu di tia,
vagnami 'sti labbra cu li tò,
dissita l'anima dintra di mia,
dammi a v'viri l'amuri tò.

Ti sentu e pi mia si 'n'alimentu
la to vuci mi trasi 'nta li vini,
un focu s'adduma nun mumentu,
ccà ti vulissi, cu mia e stari vicini.

'Sta fiamma ca cuva è viva e ardenti,
nun saggiu comu fari pi carmalla,
tu si luntana e nun po fari nenti,
iu stessu mi dugnu aiutu 'p'astutalla.

'Nveci di la me, vulissi la to manu,
pi carmari 'stu focu, ca s'accanisci,
la fiamma s'astuta pianu-pianu,
si sfoga e di piaceri s'arricchisci.

Un milioni di scintilli vibranti,
sparsi 'nta 'stu focu ardenti,
astutaru 'sta fiamma accicanti
accussì cuitaru, corpu e menti.

Ora sugnu sazziu di siti e d'amuri,
ma, 'sta fiamma l'astutassi tutti l'uri.

Petri, sciàvuru di mari

Dù petri, ammuttāti di una
e di natra onda, circāti
e truvati nni la stissa ura
di cori diversi, tràsinu
nni lu jiardinu di l'amuri
e nill'anima di dù amanti.

Dù petri, rigalāti di lu mari,
una piglià lu postu di l'àtra,
pronti pi èssiri accarizzàti,
vasati, ogni vòta ca lu pinzèru
và addabbanna l'onda
e sentisi diri: "Ti amu".

Una, cummigliàta cu tecchia
di stoffa di sita russa,
stringiuta di un fioccu
di nastro russo, jungi
ddà, unn'è lu piacìri,
la passioni, l'amuri.

L'atra, arruddàta cu carta
di un "bacio perugino", jungi
vagnata di gocci di pioggia.
È l'auguriu ca 'nta na vasata,
e di 'n'abbrazzata, li dù cori
cu amuri si jungirannu.

Duri petri, sciàvuru di mari,
ma petri, tènniri, duci petri,
custuditi e ammucciāti
'nta 'n'angulu di lu propriu cori,
pàlpitanu, aspèttanu ca veni natru
novu iornu, lu iornu di l'amuri.

Mi fici zzitu

Pi littra mi fici zzitu
cu una di luntanu,
'ni scrivemu, 'ni dicemu
l'amuri chi 'ni vulemu.

La canuscivu 'n'un ricivimentu,
pi dda iurnata persi lu sintimentu.
L'avvicinava e idda mi scappava,
circava di parlaricci, ma si girava.

Fici 'na iurnata
di iricci appressu,
nun ci potti parlari,
fu tuttu un prucessu.

La taliava e pinsava:
"Ch'è bedda! Ch'è duci!
Ch'è 'nzuccarata!
Cci issi a dari 'na vasata.

Tuttu finì, nun ci pinzavu cchiù.
Passaru iorna, notti, simani, misi.
Ogni tantu lu cori mi tuppuliava,
la menti 'n'idda mi purtava.

Un iornu mi dicisi;
la chiamavu,
nun penzu chi cci dissi,
chi cci accucchiavu.

Parla oi, parla dumani,
nasceru li sentimenti.
Ora nnì vulemu beni,
'n'amamu veramenti.

Comu lu sciumi
vasa lu mari,
puru iu, ti vulissi
vasari, amari.

Speru sulu, di sfiorari
li to labbruzza cu lu itu,
accussì putissi gridari:
"Ora sî, ca sugnu veru zzitu".

L'apa amica

'N'apa china di pòlline
vola 'nill'aria chiamàta
di 'na terra arsa e 'ncolta.

Vola tra artùri e vaddàti,
si ferma 'nta un vaddùni
cu a latu du gati muntàgni.

Tra sciuri sicchi ammusciùti,
ligna e erba senza culùri,
scopri un sorcu siccu, asciuttu.

Propriu 'ncapu; un tulipànu,
piegàtu, disidiràva
d'èssiri vagnàtu.

L'apa amica, curiùsa,
trasì pi forza nnì lu sorcu,
ma niscì sùbbitu-sùbbitu.

Trasi, nesci, milli voti,
cuntènta e sudisfàtta
ca 'mpullinà tutti cosi.

'Na cascàta d'argèntu
di veru nètteri, sciddica
adasciu-adasciu 'ni la valli.

Tutti cosi ripigliàru a vùviri,
terra, erba, pianti, sciuri,
puru lu celu divintà sirènu.

L'apa si misi a vulàri,
mentri lu tulipanu aiutàtu
di 'n'àlitu di ventu s'annacàva.

Cu un surrìsu, saluta l'apa,
ormai luntàna, nò cu 'n'addiu,
ma cu 'n'arrivedèrci.

Nun lassarimi sulu

Mi piaci parlari di tia
cu l'amici,
cci dicu di vuliriti beni,
d'amariti.

Tu sa dari
amuri, paci.

T'haiu chiestu tanti voti
di pigliarimi cu tia, ma Tu,
nunn'hai mai accittatu
'stu me disideriu.

Mi fa capiri ca ancora
nun è arrivatu lu mumentu.

A cu t'ha vulutu beni,
hà datu
tanta spiranza,
tantu amuri.

E iu, ti amu pi chissu,
pi l'amuri ca Tu duni.

Si Tu, Tu sulu
ca iu haiu amatu,
pirchè Tu
hà saputu amari.

A tia vogliu òffriri
la me vita.

Nun lassarimi sulu!
Accumpagnami 'nì lu camminu,
unni pozzu arrivari a tia
cu l'amuri ca ti vogliu.

T'haiu amatu, t'amu
e t'amerò pi sempri.

Tu, hà saputu confurtarimi
'nì li mumentu di dibulizza,
di tristizza, di scunfortu,
aiutannumi 'ni la spiranza.

Cu tia, mi piacissi,
dari l'amuri ca Tu hà.

Tu omu,
natu di la
Vergini Matri Maria,
vinisti pi sarvari lu munnu.

Sarvacci
Cristu!

Tu si l'Onniputenti,
Tu si lu Divinu,
Tu si assittato a la destra
di Diu Patri.

Tu figliu di Diu,
dunanni ancora amuri.

Quann'era nicareddu

Quann'era nicareddu ancora
cu li cazuddi curti, avia deci zziti.
Iddi nun sapivanu nenti,
ma iu c'era zzitu lu stessu.

Di luntanu ci faciva segni,
cci mannava vasateddi cu la manu,
mi taliavanu, m'arridivanu
e scappavanu.

A pranzu, mangiava lestu-lestu
pi ghilli a taliari, cci passava di 'n'intra
pi farimi vidiri, finta ca avia la tussi,
la facia cchiù forti pi farmi sentiri.

A ddi tempi, nun era facili parlari
cu 'na picciuttedda,
perciò, pi diricci quarchi cosa
ci scriviva un biglitteddu.

A una cci scrissi "Amore mio ti amo",
a natra "Amore ti voglio sposare",
ad'atri nun mi ricordu cchiù, ma,
di tutti nun 'n'appi 'na risposta.

Però, quannu 'ni 'ncuntravamu,
si capiva ca c'era amuri,
'ni parlavamu cu l'occhi,
cu li vucchi 'n'arridivamu.

A la sira mi iva a curcari
cuntenti e biatu,
spirannu ca nni lu sonnu
'na zzita m'avissi vasatu.

Ora 'nveci, li tempi canciaru,
li picciutteddi senza canuscisi,
senza parlarisi,
già fannu tutti cosi.

Ora c'è la curvivenza,
stannu 'nzemmula 'na para d'anni,
po 'na ditta, "nun 'ni capemu cchiù",
si lassanu e ognunu v`a pi la so strata.

Certu a ddi tempi c'era cchiù
'nginuità e semplicità,
ma, orbu di l'occhi, ora
'sti tempi mi piacinu cchiossà.

Lu cuncumeddu

Tra picciotti, amici e parenti,
fimmini schetti, zziti e maritati,
tutti assittati, misi a cuncumeddu,
dicemu cu è bruttu e cu è beddu.

Talia cu sta passannu ...
la muglieri di ddu bon'omu
di lu zziu Pè,
ca di corna 'n'avi a tinchitè.

Facemu cuncumeddu,
ma a nuddu parlamu.

Lu vidistivu a Pippinu
lu firraru?
È zzitu cu la figlia di Paschidda,
fa l'amuri cu atri e po v`à 'n'idda.

Facemu cuncumeddu,
ma vi giuru a nuddu parlamu.

Talia ... talia, cu st`a passannu ...
mizzica!... Mussu pittatu russu,
cazetti niuri a riti, tacchi a spillu,
caminutura lesta e passu arzillu.

Mischina, ogni ghjornu si nn`i v`a
a la missa a prigari, di piccati
nn'avi tanti, sa v`a cunfissari,
si cu l'amanti l'amuri voli fari.

Facemu cuncumeddu,
comu viditi, a nuddu parlamu.

Giacuminedda, si susì pi ghirisinni,
mancu fici deci passi, ca una dici:
Giacumina, avi un zzitu, lasdu e pilusu,
cu si cci avvicina dici puru ca è fitusu.

Cu si nnì v`a di lu cuncumeddu,
li ristanti, ognunu, dici la s`ò,
cu è 'ngrasciata, cu è ghimmirutu,
cu è pizzenti e cu è curnutu.

Ristaru Ciccu e Caluzzu,
di li d`ù, nuddu si nnì iva,
pirchè, cu ristava,
puru a iddu parlava.

Perciò tra iddi si dissiru:
caru cumpari, amuninni a la casuzza,
finu a d'ora a nuddu amu sparlato,
dissimu sulu, ca lu zziu Tanu è malatu.

Cari littura nun pinsati di falla franca,
nuddu si sarva di lu cuncumeddu,
di chiacchiari cci nnè puru pi vatri,
l'onesti, natri, li facemu diventanu latri.

Li dù cumpari

Cumpari Cì, chi ti senti mali?
Ha 'na facci ca nun mi paici,
si giannu e hà l'occhi musci.
Mi pari tecchia dipiruteddu,
fatti l'analisi, testa di muru,
acussì ti metti a lu sicuru.

Cumpari Pè, nenti haiu,
staiu bbeni, anzi, bbenissimu.

Caru Ciccu, a sapiri, ca haiu
tri casciana chini di midicinali,
nun sacciu quali m'appigliari prima,
l'haiu pi la prostata, pi lu cori,
pi lu ficatu, pi li rreni, pi li dulura,
pi gghiri di corpu e pi la dentatura.

Furtunatu ca haiu a dda biniditta
di mè muglieri, l'avi tutti scritti
'n'un fogliu, pi cchì servinu
e a chi ura mi la v`dari.
Pò, quannu è ura di la 'nghizzioni,
parica mi duna l'estremunzioni.

Li tempi ora canciaru,
avemu malatii moderni,
cc'è lu stressi, lu baipassi,
l'ecchizzema, la pissioriasi,
la depressioni, l'apatia,
l'incontinenza e l'anemia.

Pò, la cchiù gravi è la mancanza
di desideriu a lu sessu, dicica diveni
di la prostata e di la circolazioni
di lu sangu, manca l'afflussu,
pi capirinni megliu, è l'imputenza,
l'aiu iu e si lamenta mè muglieri Enza.

Cumpari Pè, si vò ca ti passa
'stu malannu e vò iri ancora avanti,
fa comu l'amicu mè, fatti l'amanti!
Pò vidi ca li lamenti, nun su li stessi
di chiddi di tò muglieri Enza,
ma tutti sospira di cumpiacenza.

Nun stari attentu a nuddu,
tu, ha sapiri 'na cosa:
qunnu ti talianu e vidunu
ca sta bbeni, si allegru,
filici e cuntenti,
si 'mmidianu e nun ti dicinu nenti.

Mentri, si ti vidunu ca si scuntenti,
tristi, scunsulatu, dipirutu e malatu,
a l'affacciu, ti dicinu ca cci dispiaci,
mentri a l'ammucciuni,
bbonu si lu l'inghinu lu maccicuni.

Lu focu

Stù focu ardenti,
cu la fiamma gata e durata
è ancora vivu pi 'natra grigliata
e farinni 'na bbona manciata.

La prima, la ficimu tempu fà
cu tanta festa, amuri e piaceri.
Lu pranzu nun lu cumplitamu
però, di sicuru, nnì sazziamu.

'Stà vota, a quantu pari,
nun sulu manca lu carbuni,
manca puru, carni e pisci
e nun sapemu comu 'ni finisci.

'Ntà lu focu,
si manca lu carbuni
avoglia di susciari
senza fiamma, chi vò fari?

Accussi su tutti li cosi,
lu focu, la fidi, l'amuri,
si nun li teni addumati,
dopu, li trovi tutti astutati.

Si 'nì la vita nun metti l'impegnu
nun ti resta nenti, mancu lu segnu.

Notti maggica

La luna 'ncelu lucenti nnì talia,
nnì fa curaggiu e comu pi maggìa
teni stritti 'sti cori 'nnamurati
di 'sti dù amanti appassionati.

Notti durata, notti 'ncantata
notti d'amuri, notti fatata,
tanti carizzi e tanti vasati,
comu si fussimu maritati.

'St'amuri ca mi duni è troppu granni,
ci sarà ancora pi cent'anni,
iu ti dugnu tuttu lu me cori,
chinu d'amuri, sicuru ca nun mori.

Tutta di tia, cu tantu piaciri mi dasti,
mancu 'na vasata pi dopu lassasti,
amuri iu, pi tia, 'nn'haiu a tinchitè,
dopu un paiu d'uri ti lu detti arrè.

Cchiù forti e cchiù densu fu l'amuri,
t'arricriasti tutta, mi chidisti pi favuri,
strincimi forti, dammi tuttu lu tò sapiri,
ti fici ristari senza sciatu, cu dù sospiri.

A la natura cci arrubbamu 'na notti,
era signatu 'ncelu, era la nostra sorti,
manciamu amuri e vasati pi cunturnu,
stritti abbrazzati ristamu finu a jornu.

La spiranza stà di natra notti,
ormai 'sti cori su propriu cotti,
si è scrittu accussì nni lu firmamentu,
sicuru ca cci sarà natru mumentu.

Dda notti la luna mi purtà furtuna,
sicuru ca nun mi lassa sulu cu una.

Pani casdu cunzatu

Quant'era bbonu ddu pani
casdu sfurnatu all'ura-all'ura
di lu furnu, curriva subitu
'n'intra pi fallu cunzari.

Me matri, pronta cu lu piattu
'ncapu lu tavulinu, tagliava
lu pani pi longu e pò a pezzi,
mi lu dava cu tanti carizzi.

Cci mittiva ogliu, sali,
tecchia di spezzii e tantu amuri,
mi lu dava 'mmanu, accussì,
beddu cottu, d'oru di culuri.

Cu li mani 'nchiappati d'ogliu,
ci dava muzzicuna di piaciri,
nnì vuliva ancora, mi diciva,
ti vastà, camina, vidi unni iri.

Tannu era tuttu genuinu,
ora 'nveci di genuinu,
nun ristà propriu nenti,
nè amicizia, né sentimenti.

Tannu c'era la veru fratellanza,
la veru parintela, lu veru amuri,
'n'abbrazzavamu, senza nenti,
èramu allegri, filici e cuntenti,

Ora ognunu cerca di futtiri all'atru,
nnì 'stà vita, si persiru li veru valura,
nun c'è cchiù amicizia, rispettu,
parintela, amuri e mancu affettu.

Chiossà chi crisciu, vaiu capennu,
ca quannu cc'èra scarsizza e pitittu,
si stava beni, ora ca cc'è abbunanza
si stà mali e lu malessiri avanza.

Perciò megliu ddi tempi
cu ddu tecchia di pani cunzatu
ca sti tempi d'ora cu tantu pani
senza scuttatu.

Quantu si beddu mari!

Quantu si beddu mari a lu tramontu,
ti taliu abbrazzatu mani manuzzi
'nzèmmula a ccù vogliu beni e amu,
sentu lu cantu di l'onda, di l'acidduzzi.

Quantu si granni mari!
Lu Signuri ti crià pi tri voti
superchiu di la nostra terra,
pari ca si fermu, ma giri e roti.

Quantu navi hai fattu passari?
Quantu storia hai 'nnarrè di tia?
Quantu novi paisi 'na fattu canusciri?
Quantu si granni mari! Mamma mia!

Mari! Di notti si 'na maggìa,
ammucci dù amanti 'nnamurati
'nmezzu la tò bianca schiuma,
li lassi senza sciatu muti, 'nfatati

Mari! Quantu si riccu?
Tu si lu rrè di l'universu,
tanti populi hai sfamatu e sfami,
senza di tia, lu munnu fussi persu.

Mari! Si beddu a la matina,
appena spunta lu suli duratu,
cci pò caminari un nicareddu
'nn'addevu scazu, appena natu.

Lu sacciu, cc'è lu suli, lu celu,
la luna, li stiddi, lu beni, lu mali,
ma si nun ci fussitu tù, mari!
Comu avissimu a campari?

Pirchì mi fa spinnari.

Passi e spassi di cuntinuu,
t'annachi, lu fa apposta,
camini dritta, nun ti voti
ti taliu, li pinzeri mi scoti.

Pirchì mi fa spinnari,
dùnami tecchia d'amuri,
carma 'sta smania c'haiu 'ntesta,
abbrazzamuni, chi nnì resta.

Cumminciti, fallu pi favuri,
lu cori mi sta scuppiannu,
ammumentu fa lu bottu,
nun lu vidi ca sugnu cottu.

Mi talii, mi fa capiri
ca piacissi puru a tia,
allura, deciditi a fari 'stu passu,
prima ca mi veni quarchi cullassu.

Ti vulissi dari du muzzicunu
unni dicu iu, pi fariti capiri
quantu ardìri haiu pi tia,
'stu focu, è cchiù di simpatia.

Ti facissi vidiri
li stiddi di mezzìò,
lu sulì di notti, la luna di iornu,
accussì mi livassi 'stu fastornu.

Dimmi di sì, accetta 'st'amuri
sicuru ca nun ti nni penti,
nun mi fari spinnari cchiù,
dimmi ca lu vò puru tu.

"Cu di spiranza campa, dispiratu mori".
Nun ci cridu, pirchè tu sì 'ni lu mè cori.

Aspittannuti

T'aspittava, tra tanti nun ti vidiva,
eratu dda, a dù passi di mia, lu sintiva.
Ti cercavu tra la genti, di luntanu
vitti ddu surrisu duci, si, si tu.

Mi veni 'ncontru, vistuta di biancu,
li nostri sguardi, s'incontranu,
mi fazzu avanti quasi a curriri,
affruntannumi 'n'abbrazzamu.

Ti strinciu a mia, sentu lu to cori
battiri forti, lu me ancora chiossà.
'Na vasata duci 'nta la guancia,
'na risatedda e natru abbracciu.

Cu l'occhi luciti di gioia, pigliavu la
to facciuzza 'nta li manu, taliavu li to
occhi, taliavu di cchiù, nintra lu to
cori, chinu d'affettu, d'amuri.

Mentri tanta genti nni passa vicinu,
natri, avvorti d'un vortici, vulamu
gatu, gatu, d'un celo limpidu e sirenu,
unni milli violini sònanu sulu pi natri.

M'addumannu si è 'na favula!
Sicura ca lu è! 'Nveci no, è di veru,
è 'na miravigliusa parentisi di vita,
unni l'amuri vinci tutti l'mpidimenti.

Unni l'amuri supera ondi 'mpituusi,
unni QUARCUNU, di dda 'ncapu talia,
pruteggi, custudisci dù teniri cori,
l'amuri di dù amanti 'nnamurati.

Stritti pi manu taliannuni 'nta
l'occhi, tra tanti genti, tra tanti rumura,
suli, libiri e filici, nni 'ncaminamu
versu 'na via, la via di l'amuri.

Ricotta cu lu sero e pani sminuzzatu

Quann'era nicu, cu me matri,
certi matini, ìvamu âccattari
la ricotta cu lu sero. Mi piaciva videri 'ntornu a lu
casdaruni tanti cristiani
c'aspittàvanu c'acchianava la ricotta,
bedda bianca, casda-casda e cotta.

Iu cu li cazi curti,
un magliuneddu di lana,
ca era prima di me frati,
cu li manuzzi 'nsacchetta,
li spadduzzi arrunchiati,
mi sintiva tutti cosi gilati.

Tra iddi fimmini, sparlittìvanu,
cu diciva ca donna Sarina aviva
la caputa lorda e ammaccata,
cu diciva ca la 'ngnura Tresa
s'arricampà senza facci lavata,
e ccu avia la vistina sciardata.

Certi voti parlàvanu a bassa
vuci pi nun mi fari sèntiri.
Parlàvanu di la muglieri
di lu dutturi ca cci faciva
li corna a ddu fissa di lu maritu
cu lu figliu di lu nutaru Territu.

Senza vuliri, mi 'ntrumisi dicennu:
"Mi pariva onesta la signural".
Mancu finivu di dillu, m'arrivà
'na masciddata di me matri
narrè lu cozzu ca mi fici stunari.
Mi dissi: "zzittuti, nun t'ammiscari".

Ognuna avìa la so caputa, cu purtava
la tazza cu lu pani ggià sminuzzatu,
cu purtava pignati e pignateddi,
cu la vuliva sparti, di una la ricotta
e di l'atra cci vuliva lu seru,
chissu chi vi cuntù è tuttu veru.

Comu acchianava, tutti vulìvanu èssiri
allistuti pi prima, cu diciva: "ass' allesti
a mia ca àiu a me maritu malatu",
cu si 'nn'avìa agghiri a travagliari,
tutti si stringìvanu a lu casdaruni,
scantànnusi di ristari addiuni.

Donna Maria, vistuta tutta di nìuru,
fìmmìna tutta d'un pezzu, quantu
aviva li spaddi, aviva scianchi e pettu.
u la scumera 'mmanu, pigliava
la ricotta, mmezzu tutta dda fudda,
fina-fina, a sfoglia di cipudda.

Iunti dintra, me matri priparava
li tazzi, cci sminuzzava lu pani di lu
iornu prima, 'ncapu cci mittiva
ancora casda, la ricotta cu lu seru,
tutta la famiglia faciva colazione,
pi natri era festa, pariva l'Ascenzioni.

Tannu, la ricotta cu lu seru,
si manciava pi pitittu,
nni inchìvamu la panza
e nni faciva prufittu,
ora 'nveci s'accatta sulu pi piaciri,
si mància a scopu, pi megliu iri.

A Lillu Firettu

Paremu tutti ugali, ma quarcunu
è diversu. Tu, dasti cchiù amuri
all'atri, ca a tia stessu.
Èratu sempri prontu pi l'amici
'ntutti l'uri, 'ntutti li maneri
cu modi dilicati, sinceri.

Fusti n'omu semplici,
ma granni di cori,
d'animu e di menti.
Cu parlava, cu sparlava
facivatu finta di nenti,
fusti amatu di tanta genti.

Quannu passivatu,
allustravatu 'na chiazza,
cu lu tò abbigliamentu,
cu lu tò purtamentu.
Vistutu sempri armuniusu
cu l'animu bonu e amurusu.

Ti sugnu gratu ca mi dasti
tanta amicizia. Fusti l'amicu
di l'amici, cu t'avvicinava
t'abbrazzava cu tantu piaciri
facennuti tanti complimenti,
la tò vucca era sempri surridenti.

Nunn'era tempu di iritinni,
avivatu tantu ancora di scriviri.
Ti nni isti 'nsilenzu,
ma lassati lu tò sorrisu,
lu tò cori chinu d'affettu,
grazii cuscònu Lillu Firettu.

'Na spica virdi

'Nta un càmpu di spichi duràti,
cu dritti, cu piegàti, accarizzàti
di un vinticèddu di sciròccu,
stritti 'nta 'na rigugliusa danza,
si senti lu càntu di milli cardellini,
la sinfunìa di milli violini.

Tra iddi, nnì scuprìvu una ancòra virdi,
piegàta comu si s'affruntàssi di mia,
di lu mè tattù, di li mè carizzi.
Mi la vulissi pigliàri, ma nun pòzzu.
La lassàvu unn'era pi puntigliu,
comu cci passu arrè la pigliu.

Cci ripassàvu dopu. Ddu campu
di spichi duràti, fu tuttu mitùtu,
lu cori si strincì, li mani trimàru,
l'occhi si vagnàru, dda bedda
sinfunìa, nun si senti cchiù,
dda spica virdi ... nun c'è cchiù.

Camìnnanu tra timpi sicchi, stancu
e avvìlùtu, tra caduti e ghisàti,
parsi sèntiri 'na vuci sussurràrimi quarchi
cosa. Mi giru, vidu la spica virdi
'lluminàta d'un raggiu di suli,
cu attòrnu una, centu, milli violi.

Mi piegu versu d'idda, la pigliu,
la tègnu 'mmanu. Haiu di diricci tanti
cosi, ma, aspettu a idda ca mi dicissi di
putilla sfugliàri, di gustàri li sò coccia,
di manciari lu sò priggjàtu furmentu,
duci-duci, accùssì ... cu sintimentu.

Un forti ventu di maistràli,
si purtà dda spica virdi.
Ti nnì jisti accùssì ... senza fari rumùri
prima ancora ca nascissi 'n'amuri.

Di notti

Fora lu barcùni di notti, cu l'occhi
chiusi, misu 'nta na sdraia, cu li mani
narrè lu cozzu e li pedi 'ncapu un
sgabellu; penzu a tia fimmina di dopu
lu strettu, l'amuri chi nni rigalàmu,
quannu nni li labbra nni vasàmu.

Tra chianùri, muntàti,
cullini, muntàgni,
sciumi, mari,
paisi e città,
passavu lu strettu cu quattru vrazzati
pi truvàri a tia e dàriti tanti vasati.

Chistu fù l'inizziu di lu nostru amùri,
durà picca, ma fù chinu di tantu calùri.
Po, lu strettu, lu passasti tu a caminàri,
finu a jùngiri a mia e l'amuri truvàri.
Fù 'na notti d'amuri 'nfucàta,
china di carizzi e vasati,
stritti-stritti ristamu abbrazzati.

Po, lu tempu nni fù nimìcu,
nun nni fici vùdiri cchiù pi nenti.
La spiranza ora cc'è; rifletti,
pi dopu nun diri: "L'avissi fattu!"
Chistu è lu nostru giustu mumentu
è scrittu 'ncelu nni lu firmamentu.

Chistu è lu pinzeru di unu 'nnamuratu
chi spera ca 'stù strettu vinissi passatu
nun vidi l'ura d'abbrazzari la so amata
pi passari cu idda natra notti 'nfucata.
Di notti di la sdraia m'avìa allavancatu
ora capìvu; m'avìa appinnicàtu.

Lu paccu di l'America

Senza la famiglia,
senza nuddu di natri,
sulu e persu era mè patri.
Addabbàna lu mari granni,
partì pi ghiri a travagliari,
a fari sacrifici pi natri sfamari.

Nun putiva parlari cu nuddu,
'un c'era unu chi lu capiva,
suliddu a curcàrisi si nni iva.
Stava, pi scuttàrisi lu panuzzu,
luntanu di lu so paisi,
unni cc'era tanta crisi.

La mancanza di me patri
a ura di manciari si sintiva.
lu duluri di me matri si vidiva.
La vacca nun ci arridiva cchiù,
avìa sempri l'occhi lacrimùsi,
lu cori e li vrazza tiniva chiusi.

Cci mancava me patri,
cci mancava lu sonnu,
cci mancava lu munnu.
Si dedicava a la casa e a natri,
a la matina 'n'addivigliàva
e sùbbitu a la scola 'ni mannava.

Dda vòta ca vitti arrìdiri a me matri,
fu quannu arrivà lu paccu di l'America,
pi tutti natri fù festa, parsi duminica.
Dopu tanta carta, grapèmu lu paccu.
'Ncapu di tutti, cc'era un vistiteddu
cu 'na carta scritta: "Pi Pippineddu".

Sùbbitu mi lu pruvavu,
mi stava a pinnèllu,
a me matri cci diciva: "Talè che bellu".
Pi me matri cc'eranu tanti vistini,
pi me frati, pantaluna e giubbotti,
po, cinti, scarpi, cullani e cappotti.

Ancòra cc'èranu: cciunchi, caramelli,
rigali pi me zzia e puru pi me zziu.
Cc'era ogni gràzzia, lu bbeni di Diu.
All'urtimu di tutti cc'era 'na littra
chiusa cu 'na spilla d'oru di lussu,
e un grossu cori di curallu russia.

Supra cc'era scrittu: "Pi me muglieri".
Me matri, la vasà e la strincì a lu pettu,
segnu di gioia, d'amuri, d'affettu.
Arridennu, chiancennu e abbrazzànnuni dissi:
viditi lu papà quantu cosi mannà?
Ora itivinni fora a jucari, iu restu ccà.

Comu rientramu, trovamu a me matri
assittata 'nta la sèggia chi chianciva,
la littra aperta stritta a lu cori tiniva.
Anchi ca èramu nichì, capemu ca pi
me matri, la littra, fu lu megliu rigalu,
s'assciucàva li lacrimi, cci parìa malu.

Mezzu chilu di poesii

Vinnu poesii;
l'haiu d'arrìdiri, di chiànciri,
d'amuri, d'òdiu, di sdegnu, d'affettu,
li scrivu cu lu cori, cu tantu rispettu.

Accattativilli 'na mezza chilata,
l'haiu pi comu vatri li vuliti,
haiu puru chidda mutivata,
pi cantalla a la rifriscata.

Li poesii, si spizzùlianu
comu lu panuzzu friscu,
cu lu sciavuru di la farinedda,
cci duni li primi muzzicunèdda.

Tutti nun vennu li stessi,
cu su abbrusciateddi, cu crudi,
cu mali cotti, cu beddi durati,
cu d'oru culatu, diciottu carati.

La poesia è comu 'na rosa,
sfògliala di li petali e leggila,
cc'è tantu di sapiri,
tantu di capiri.

Tu ca sì allitratu,
accàttati mezzu chilu di poesii,
pòrtali di casa 'ncasa, a li to parenti,
spàrtili a li to figli, falli cuntenti.

Dùnali a li to amici, a li to nipùti,
a la genti disidirusa di lèggiri, di sapiri;
nun vogliu sordi, nne dopu, nne ora,
mi basta 'na penna, pi scrìviri ancòra.

Tu si la vita

Senza tia 'un pozzu stari.
Si mi manchi,
lu cori m'addiventa
siccu comu 'na petra.

Cu ti crià,
già sapia la forza,
e la putenza c'aviatu aviri
'ncapu 'sta terra.

Tu, accussì
fina e dilicata,
astuti nichì
e granni fiammi.

Tu nasci supra
un pizzu di muntagna,
scinni lenta e cu amuri
dissiti la tanta arsura.

Senza tia, un sciuri, 'na spica,
'na rosa, un fruttu, 'un nasci.
Tu si la veru forza di la natura.
Si tu, limpida e cristallina.

Si tu chi duni vita.
Si tu ca fa battiri 'stu cori.

Davanti la porta

Assittàtu davanti la porta, vidu
tanti cosi ca nun vulissi vidiri.
Genti 'mpurtanti c'addimànnanu,
cu pari poviru 'nveci sta beni.
Vidu lu munnu malatu,
troppu malu cumminatu.

Vidu 'na matri chiànciri
lu propriu figliu,
stinnicchiatu 'nterra,
tuttu 'nsanguliatu,
mortu ammazzatu
di la mafia scannatu.

Vidu genti senza casa, senza un lettu,
cu avi villi e dorminu sutta un tettu.
Cu s'affùca pi travagliu, e cu lu rifiuta.
Cu è malatu e nun si po curari.
Genti chi spara pi un pezzu di pani
e cu lu jetta o lu duna a lu cani.

Viddàni ca zzàppanu la terra
pi ricavàri quarchi cosa,
a cunti fatti cci vannu di sutta.
Puliticianti ca dūnanu appalti
e sutta manu ricèvinu mazzètti,
pi chissi cci vulissiru li manètti.

Genti ca s'arricchiscinu cu la droga,
senza capiri lu mali chi fannu a 'stu munnu,
a 'sti 'nnuccenti ca criscinu,
a iddi stessi, a li niputi, a li so figli.
Tra iddi stessi vennu 'ngannati,
arristati, carzarati, cunnannati.

Ma chi munnu è chistu?
scanciu di vùlirini beni
n'ammazzàmu l'unu cu latru?
Pirchè quarcunu cci cumanna?
Si nni purtaru a tutti addimannari,
uncèmunì natri e jemu a cumannari.

Vidu passari un picciuttuni
cu li sànnuli 'nta li pedi,
tuttu cummigliatu finu 'ntesta.
Lu fermu di la sò corsa pi d'iricci:
a ccu cerchi? Unni vo jiri?
Chi vo sapiri?.

Taliannulu 'nta la facci
ca si cci vidiva appena,
cu dda varbuzza durata,
orbu di l'occhi, mi parsi
avìri 'nnavanti lu Signuri
piatusu e chinu di duluri.

Cci dissi:
unni 'sta jennu cu tanta primura?
Mi rispunnì cu tecchia di sciatu:
"mi mannà me Patri
pi sarvari 'stu munnu,
ma 'un c'è versu e giru 'ntunnu."

'Mmenti me pinsavu?
Poviru Figliu!
Nun ci arriniscisci add'epuca,
fusti frustatu, suffristi tanti peni
t'ammazzaru, muristi 'ncruci.
ora, fa di 'sti tenibri tanta luci.

Mi nni trasivu dintra cu tanta spiranza,
'nginucchiuni prigavu lu Santu Patri,
chi nni dassi paci, amuri a tutti natri.

Mi piacissi vùdila arrè

Canuscivu 'na signura 'mpurtanti,
bedda di facci e sicuru bedda di cori.
Fimmina sperta, struita e 'ntilligenti,
limpida comu l'acqua di na surgenti.

Taliannula 'nta ll'occhi,
ristavu 'allucutu,
ristavu allammicatu,
ristavu emozzionatu.

Mi parsiru du lampadini di milli,
cu 'na luci casda e pinitranti,
nun sappi cchiù chi fari,
si l'avìa salutari o l'avìa vasari.

Nni taliamu 'nta ll'occhi.
Cci vuliva diri tanti cosi,
mi niscì sulu un cumplimentu,
dopu, fù tuttu un turbamentu.

Mi piacissi vùdila arrè. Cci dicissi:

chi si bedda, chi si fina,
mi pari 'na riggina,
nun mi fari spasimari,
avvicinati, fatti vasari.

S'è veru ca existi la spiranza,
mi armu di Santa pacenza,
senza tempu ne scadenza
aspettu ca s'avvera 'sta crianza.

Cumpàri e cummàri

Ddu iornu 'un mi pozzu scurdari
tra canti, musica e balli particolari,
lu me cori cu tia vuliva parlari,
ma nun ti potti mancu avvicinari.

Cumpari miu, chiju jornu, t'assicùru,
io non guardava a nuju,
l'occhi mei brillàvanu di cuntentizza,
avenu i presentari u libbru mio,
e io poetessa arricriata mi sentia,
na perla di lu mari rigalata.

Certu arraggiuni hai, cummari mia,
ma iu, 'nta li spini stetti dda jiurnata,
m'avissi accuntintatu macàri
ti tucàriti sulu la manu,
vasaritilla, pianu-pianu.

Perdùnami cumpari duci assai,
non potia sapiri cu quantu amuri,
mi cercàvanu chist'occhi nnamurati,
nu sulu a manu t'avarria datu,
ma l'occhi mei nte toi
l'avarria arripasati!
Ma non ti dispiaceri, cà tu,
tantu abbussasti a chistu cori
chi mò dinventau poesii d'amuri.

Vaiu capennu ca chiddu chi scrivi
è troppu duci cara cummaredda,
si 'n'amuri, si propriu bedda.
Si 'na fimmina cu un cori
chinu d'amuri, granni quantu lu mari,
lu grapi pi dallu a 'stu cumpàri.

'Sta cummàri e 'stu cumpàri,
su davvèru spiciàli, èsistinu veru.
Si amaru e si vulissiru amari arrè,
nuddu lu sapi, sulu idda e iu vidè.

Sciuri pi tia

Sciuri, passioni, amuri,
pi tia natura duci mia.

L'orchidea,
tu, comu idda, china di sensualità
mi offri la to anima, lu to cori.

La mimosa,
nascì pi tia fimmina miravigliusa
di la peddi livigata, villutata.

La nebbiolina,
senzu di liggirizza, comu a tia,
esili, duci, dilicata, fina.

La felce,
comu cu lu to corpu ti metti
davanti a mia, nill'abbrazzàrimi,
nill'accarizzàrimi, 'ni lu vasàrimi.

'Stu mazziceddu nicu-nicu,
nascì di la passioni di un 'namuratu,
passà lu mari e arrivà 'ni li mani
e 'ni lu cori di l'amata.

Ristassi 'ni 'n'angulinu
aspittannu c'avvinissi
lu miraculu di la primavera,
unni la natura s'addiviglia, e puru
nni la fimmina, casa di disidèriu,
di passioni, di amuri.

Pi tia fimmina, ca cu lu to surrisu,
fa filici a mia e lu munnu 'nteru.

Pani e vinu

Donu di nostru Signuri
pi l'omu nni la terra.
Di lu furmentu a lu pani,
di la vigna a lu vinu.

Lu spizzà;
nni lu detti a mangiari a natri
nutrimentu di lu so corpu
pi la nostra vita.

Si lu vippi;
nni lu detti a vùviri a natri,
bivanda di lu so sangu
pi fàrinni vùviri di piaciri.

"E sarò pane e sarò vino".

Grazzi pi èssiri cu natri,
pi la vita ora e dopu pi l'eternità.
Tu ni dunasti la vita,
natri ti uffremu l'anima.

Si perdu l'ali

Si perdu l'ali,
nun putissi cchiù vulari nni lu to nidu,
e mancu purtàriti l'amuri ca tu vo,
nè dissitari la to siti.

Nun putissi cchiù purtàriti tra l'arbuli,
fàriti assaggiari li frutti di la natura,
assapurari lu civu, lu nettari,
ne vagnàrinni 'nta la schiuma di l'onda.

Si perdu l'ali,
nun putissi cchiù sèguiri lu to volu,
ti pirdissi mezzu milli stiddi,
cu iddi li cchiù beddi ricordi.

Stassi a taliari la to vita
senza putiriti purtari cu mia
'ncapu lu celu, mezzu li nuvuli,
'ncapu un sciumi, 'ncapu 'na rosa.

Si perdu l'ali ...
perdili puru tu.

Lu veru pueta

Quantu poesii cci vonnu
pi divintari pueta?
Comu unu scrivi 'na poesia,
a menti sò, già è pueta.
A mia nun mi pari giustu
appropriàrisi di tantu sapiri.
Nta ogni paisi, mìnimu,
cci su 'na cinquantina di pueti,
ognunu si senti megliu di l'atru.
Po cci su chiddi ca si sèntinu
supiriuri a Danti. Ma dicu iu,
'n'hànnu sali 'ntesta 'sti pirsuni?
Iu haiu scrittu tanti e tanti poesii,
haiu ricivutu un saccu di premi,
ma pueta nun mi cci sentu
e mancu cci sugnu.
La poesia è 'na vera virtù,
cu scrivi l'havi nta lu cori,
ogni versu, unu appressu a l'atru,
veni dittatu di lu funnu dill'anima.
Nni la poesia, sa va sèntiri
lu cori battiri forti,
la musica nni li palori,
l'emozzioni nni l'occhi,
lu trimulìu nni li mani,
la scossa nni lu corpu.
Eccu cu è lu veru pueta!
Lu veru pueta è chiddu ca nun scrivi
tantu pi fari 'na poesia, ma scrivi
pi dari un missaggiu di beni
e di fratillanza a la genti.
'Nsignàri a un picciliddu
ca va a la scola, l'amuri pi l'atru,
pi la paci, pi la fidi, pi lu Signuri.

Pi mia, pi èssiri veru pueta,
si cci a va nàsciri, a va èssiri
donu di la natura, donu di Diu.
Sulu iddu è lu veru, unicu pueta.

Vinissi, vulissi

Vinissi a la to casa, unni nasci l'arti,
'mezzu pinzedda, culura, tili, pittura,
fogli d'appunti sparsi, versi e poesii,
un sentimentu duciddu vola nill'aria.

Vulissi assittàrimi nni lu divanu, avìriti
'ncapu li me dinocchia, abbrazzàriti,
sèntiri lu to profùmu, vasàriti,
ralligràrimi di li to carizzi.

Vinissi 'nta la strata, parlari di poesia,
taliari lu celu stiddu, la natura,
ammirari lu mari, mari ca cci sparti
e cci jiunci 'ni li pinzera e sentimenti.

Vulissi, taliànnuti 'nta ll'occhi,
capiri can nun stamu facennu
nenti di malu, capiri ca nni stamu
rigalannu tantu affettu, tantu amuri.

Vinissi ora, prima ca lu tempu
passassi lu limiti e la raggiuni,
prima di chiùdiri l'occhi
e lu sulì nun vùdiri cchiù.

Vulissi dàriti chiossà, pirchè mèriti,
dàriti chiddu ca nun 'nn'hai avutu,
fàriti gòdiri ddu sapuri duci
di la vita, di l'amuri.

Vinissi a 'ncuntràriti comu l'omu to,
uffririti 'na nova vita, cu tia jiùngiri
'ni la cima cchiù gata, vùviri l'acqua
chiara di la surgenti, sazzàrini d'amuri.

Vulissi pigliàriti 'mbrazza e purtàriti
'ni l'ondi, natàri cu tia dopu l'orizzonti
e a calari di lu sulì, gòdiri di lu primu
novu nostru unicu tramontu.

È tardu

Estati, primavèri,
autunni, 'nverni
accussì l'anni,
pàssanu 'nfretta,
cùrrunu, vòlanu.

Tu stelu,
di prizziusa rosa russa,
aspetti a mia gòccia di vita
pi vagnàriti, sciuriri ancòra,
ma è tardu pi fari nàsciri un sciuri.

Di terri luntani, rosa, nun 'ni vitti mai,
l'avissi abbriviratu ogni calata di sulì.

Po' 'mprimavera, quannu la natura
s'addiviglia e tuttu sciurisci,
tu rosa russa, cu l'amuri
chi è dintra tia,
m'avìssitu rigalatu un sciuri.

Sciuri ca fa nàsciri natru sciuri
e natru ancòra e ancòra sciùri.

Tu stelu,
riccu di fogli sempri viridi,
a 'mmidia di milli atri sciuri,
ancòra si scigliutu comu primu sciuri
nni li jiardina cchiù vèggiti di la terra.

Nun fai cchiù rosi, ma fusti la cchiù
eleganti, rara, priggjata rosa russa.



Giuseppe Cardella è un artista riberese che da qualche decennio si dedica con passione alla pittura. Da giovane è un sarto esperto e ricercato. Da questa sua attività professionale sviluppa, con la stoffa, la creatività artistica che lo porteranno successivamente ad essere un

apprezzato pittore e ultimamente anche un attento poeta. Per venti anni, Cardella manipola e cuce la stoffa degli abiti. Per altrettanto tempo, manipola le tele sviluppando tecniche nuove e tridimensionali ed opere artistiche oniriche.

L'artista passa dal lavoro manuale ad una complessa ricerca mentale che gli consente di spaziare tra pittura e poesia. Non si definisce un poeta perché è un autodidatta in campo culturale.

Scriva da tempo, conserva le sue poesie e solo ora li rende pubbliche per manifestare l'interiorità artistica che esplicita con tele e con l'opera poetica. Giuseppe Cardella si scopre pure poeta. Scrive in dialetto perché riesce meglio a rappresentare la complessa e variegata sicilianità con un linguaggio, non arcaico, ma comprensibile sia agli anziani che ai giovani, ma scrive anche in lingua.

Ha già scritto alcune commedie che sono al vaglio di registi agrigentini e di associazioni culturali amatoriali che intendono portarle in scena.

Cardella è gallerista, operatore culturale, apprezzato "talent scout" e organizzatore di manifestazioni artistiche locali e provinciali. Ha scritto ed illustrato con le sue tele il volume "Mondo onirico".

In questa raccolta, il poeta dà una ampia visione del suo operato.

Enzo Minio

Indice

	Pagina		
Sciuriddu beddu	4	Sutta un pedi d'aranciu	38
Un muzzicuni d'apa	5	A lu scuru	40
Lu cardidduzzu	6	Sciatu me	41
Arricoglimi	9	Chi fimmina	42
Tecchia di paci	11	Amicizia, donu raru	43
Lu citrolu	12	Lu vastuni di me nonnu ..	44
Quattru rosi	14	Fruttu di mari	45
Scaza	15	Oi è Pasqua	46
Meglio oi ca dumani	16	L'urtimu rigalu	48
Patri	17	Quannu tu nun ci si	49
Dducu 'ncapu	18	L'estati	50
Sciallu russia	19	Lacrimi e suffirenze	52
Lu viniceddu	20	'Na taliata pinitranti	54
L'urtima foglia	22	Pani, viscotta	
Oh! Cristu	23	e farinedda	55
Lu me paisi	24	Piccatu!	57
Li me anni	26	Lassami cu lu Signuri	58
Prighiera	27	L'arsura	59
'Na vasata	29	Chiddu chi appi	
L'omu	30	di fari lu fici	60
La pinzioni	32	Ancora nun sapi nenti	62
Quannu nascisti	33	Du coccia di grannuli	63
La notti di Natali	35	Iu sugnu pronti	64
Chi ti nni pari	36	Si ti chiamassitu	65
Lu sulì di Valderici	37		

Indice

Addubba cu 'stu maccicuni	66	L'apa amica	101
'Mpronta ni la rina	68	Nun lassarimi sulu	103
Cu l'occhi chiusi	69	Quann'era nicareddu	105
'Na farfalla di sita russa	70	Lu cuncumeddu	107
Nun c'è cchiù 'na muddichedda d'amuri	72	Li dù cumpari	109
Panuzzu	74	Lu focu	111
Zuccaru filatu	75	Notti maggica	112
Amari, amuri amaru	78	Pani casdu cunzatu	114
Dimmi ca ti pintisti	79	Quantu si beddu mari	116
Sulu a tia haiu amatu	80	Pirchè mi fa spinnari	117
Ricordu di scola	81	Aspittannuti	119
Ti lodu e ti cantu	82	Ricotta cu lu seru e pani sminuzzatu	121
Aspittannuti	83	A Lillu Firettu	123
'Na stritta di manu	85	'Na spica viridi	124
Lu friscalettu	86	Di notti	126
'Na petra	88	Lu paccu di l'America	127
Lu granatu	89	Mezzu chilu di poesii	129
A lu Signuri	90	Tu si la vita	130
Narrè 'na finestra	91	Davanti la porta	131
Lu piccatu	92	Mi piacissi vùdila arrè	133
Lu bammineddu	94	Cùmpari e cùmmari	134
Smania d'amuri	96	Sciuri pi tia	136
Arsu di siti	97	Pani e vinu	137
Petri, sciavuru di mari	98	Si perdu l'ali	138
Mi fici zzitu	99	Lu veru pueta	139
		Vinissi, vulissi	141
		E' tardu	143

Autore
Giuseppe Cardella
Via Castelli, 36 - 92016 Ribera (Ag)
Tel. 0925 66028 - Cell. 338 9652710
Sito web: www.cardellaart.it
E-mail: giuseppe@cardellaart.it
Youtube: [giuseppcardella1](https://www.youtube.com/user/giuseppcardella1)